


申
14



桂海虞衡志序

始余自紫微垣出帥廣右姻親故人張飲松江皆以炎
荒風土爲戚余取唐人詩考桂林之地少陵謂之宜人
樂天謂之無瘴退之至以湘南江山勝於驂鸞仙去則
宦遊之適甯有逾於此者乎旣以解親友而遂行乾道
八年三月旣至郡則風氣清淑果如所聞而巖岫之奇
絕習俗之淳古府治之雄勝又有過所聞者余旣不鄙
夷其民而民亦矜予之拙而信其誠相戒毋欺侮歲比
稔幕府少文書居二年余心安焉承認徙鎮全蜀亟上

疏固謝不能留再閱月辭勿獲命乃與桂民別民觴客
於途既出郭又留二日始得去航瀟湘絕洞庭沂灩澦
馳驅兩川半年達于成都道中無事時念昔游因追記
其登臨之處與風物土宜方志所未載者萃爲一書蠻
陬絕徼見聞可紀者亦附著之以備上訓之圖噫錦城
以名都樂國聞天下余幸得至焉然且惓惓於桂林至
爲之綴緝瑣碎如此蓋以信余之不鄙夷其民雖去之
遠且在名都樂國而猶弗忘之也淳熙二年長至日吳
郡范成大至能書

桂海虞衡志目錄

志巖洞

志金石

志香

志酒

志器

志禽

志獸

志蟲魚

志花

志果

志草木

雜志

志蠻

目錄終

桂海虞衡志

宋 吳郡范成大至能撰

志巖洞

余嘗評桂山之奇宜為天下第一士大夫落南者少
往往不知而聞者亦不能信余生東吳而北撫幽薊
南宅交廣西使岷峨之下三方皆走萬里所至無不
登覽太行常山衡嶽廬阜皆崇高雄厚雖有諸峰之
名政爾魁然然大山峰云者蓋強名之其最號奇秀
莫如池之九華歛之黃山括之仙都溫之鴈蕩夔之

巫峽此天下同稱之者然皆數峰而止爾又在荒絕僻遠之瀕非几杖閒可得且所以能拔乎其萃者必因重岡複嶺之勢盤亘而起其發也有自來桂之千峰皆旁無延緣悉自平地崛然特立玉筍瑤簪森列無際其怪且多如此誠當爲天下第一韓退之詩云水作青羅帶山如碧玉簪柳子厚訾家洲記云桂州多靈山發地峭豎林立四野黃魯直詩云桂嶺環城如鴈蕩平地蒼玉忽嵯峨觀三子語意則桂山之奇固在目中不待余言之贅頃嘗圖其真形寄吳中故

人蓋無深信者此未易以口舌爭也山皆中空故峰下多佳巖洞有名可紀者三十餘所皆去城不過七八里近者二三里一日可以徧至今推其尤者記其略

讀書巖在獨秀峰下直立郡治後爲桂主山傍無坡阜突起千丈峰趾石屋有便房石榻石牖如環堵之室顏延年守郡時讀書其中

伏波巖突然而起且千丈下有洞可容二十榻穿鑿通透戶牖傍出有懸石如柱去地一線不合俗名馬伏波

試劍石前浸江濱波浪洶湧日夜漱齧之
疊綵巖在八桂堂浚支徑登山大半有洞曲轉穿出山
背

白龍洞在南溪平地半山中龕有大石屋由屋右壁入
洞行半途有小石室

劉仙巖在白龍洞之陽仙人劉仲遠所居也山室高寒
出半山閒

華景洞高廣如十閒屋洞門亦然

水月洞在宜山之麓其半枕江天然剜刻作大洞門透

徹山背頂高數十丈其形正員望之端整如大月輪江
別派流貫洞中踞石弄水如坐捲蓬大橋下

龍隱洞龍隱巖皆在七星山脚沒江水中泛舟至石壁
下有洞門高可百丈鼓櫂而入仰觀洞頂有龍跡天
矯若印泥然其長竟洞舟行僅一箭許別有洞門可出
巖在洞側山半有小寺卽巖爲佛堂不復屋

雉巖亦江濱獨山有小洞洞門下臨灘江

立魚峰在西山後雄偉高峻如植立一魚餘峰甚多皆
蒼石刻峭

棲霞洞在七星山七星山者七峰位置如北斗又一小峰在傍曰輔星石洞在山半腹入石門下行百餘級得平地可坐數十人傍有兩峰其一西行兩壁石液凝沍玉雪晶熒頂高數十丈路闊亦三四丈如行通衢中頓足曳杖鏗然有聲如鼓鐘聲蓋洞之下又有洞焉半里遇大壑不可進一路北行俯僂而入數步則寬廣兩傍十許丈鍾乳垂下纍纍凡乳牀必固石脈而出不自頑石出也進里餘所見益奇又行食頃則多歧遊者恐迷途不敢進云通九疑山也

元風洞去棲霞傍數百步風自洞中出寒如冰雪

元字胡涓

切

曾公洞舊名冷水巖山根石門砒然入門石橋甚華曾丞相子宣所作有澗水莫知所從來自洞中右旋東流橋下復自右入莫知所往或謂湫流入於江也度橋有仙田數畝過田路窄且溼俯視石罅尺餘匍匐而進旋復高曠可通棲霞

屏風巖在平地斷山峭壁之下入洞門上下左右皆高廣百餘丈中有平地可宴百客仰視鍾乳森然倒垂者

甚多躡石磴五十級有石穴通明透穴而出則山川城郭恍然無際余因其處作朝天觀而命其洞曰空明
隱山大洞皆在西湖中隱山之上
一曰朝陽二曰夕陽
三曰南華四曰北牖五曰嘉蓮六曰白萑泛湖泊舟自西北登山先至南華出洞而西至夕陽洞窮有石門可出至北牖出洞十許步至朝陽又西至北牖穴口隘狹側身入有穴通嘉蓮西湖之外既有四山巉巖碧玉千峰倒影水面固已奇絕而湖心又浸陰山諸洞之外別有奇峰繪畫所不及荷花時有泛舟故事勝賞甲於東

南

北潛洞在隱山之北中有石室石臺石果之屬石果作荔枝胡桃棗栗之形人采取玩之或以釘盤相問遺

南潛洞在西湖中羅家山上

佛子巖亦名鍾隱巖去城十里號最遠一山萃起莽蒼中山腰有上中下三洞最廣中洞明敞高百許丈上洞差窄一小寺就洞中結架因石屋爲堂室

虛秀洞去城差遠大石室面平野室左右皆有徑隧各數十百步穿透兩傍亦臨平野以上所紀皆附郭可日

涉者餘外邑巖洞尚多不可皆到興安石乳洞最勝余
罷郡時過之上中下亦三洞此洞與棲霞相甲乙他洞
不及也陽朔亦有繡山羅漢白鶴華蓋明珠五洞皆奇
又聞容州都嶠有三洞天融州有靈巖真仙洞世傳不
下桂林但皆在瘴地士大夫尤罕到

志金石

本草有玉石部專主藥物非療病雖重不錄此篇亦
主爲方藥所須者

生金出西南州峒生山谷田野沙土中不由礦出也峒

民以淘沙爲生坏土出之自然融結成顆大者如麥粒
小者如麩片便可鍛作服用但色差淡耳欲令精好則
重鍊取足色耗去什二三旣鍊則是熟金丹竈所須生
金故錄其所出

丹砂本草以辰砂爲上宜砂次之今宜山人云出砂處
與湖北犬牙山北爲辰砂南爲宜砂地脈不殊無甚分
別宜砂老者白色有牆壁如鏡生白石牀上可入鍊勢
敵辰砂本草圖經乃云宜砂出土石閒非白石牀所生
卽是未識宜砂也別有一種色紅質嫩者名土坑砂乃

是出土石閒者不甚耐火邕州亦有砂大者數十百兩
作塊黑闇少牆壁嚼之紫黛不堪入藥彼人惟以燒取
水銀圖經又云融州亦有砂今融州元無砂邕融聲相
近蓋誤云

水銀以邕州溪洞硃砂末之入爐燒取極易成以百兩
爲一銚銚之制以豬胞爲骨外糊厚紙數重貯之不漏
鍾乳桂林接宜融山中洞穴至多勝連州遠甚余遊洞
親訪之仰視石脈湧起處卽有乳牀如玉雪石液融結
所爲也乳牀下垂如倒數峰小山峰端漸銳且長如冰

柱柱端輕薄中空如鵝管乳水滴瀝未已且滴且凝此
乳之最精者以竹管仰盛折取之鍊治家又以鵝管之
端尤輕明如雲母爪甲者爲勝

銅邕州右江州峒所出掘地數尺卽有礦故蠻人好用
銅器

綠銅之苗也亦出右江有銅處生石中質如石者名石
綠又有一種脆爛如碎土者名泥綠品最下價亦賤
滑石桂林屬邑及猺洞中皆出有白黑二種功用相似
初出如爛泥見風則堅又謂之冷石土人以石灰圻壁

學海類編 卷之七 遊覽
及未乾時以滑石末拂拭之光瑩如玉
鉛粉桂州所作最有名謂之桂粉其粉以黑鉛著糟甕
罨化之

無名異小黑石子也桂林山中極多一包數百枚
石梅生海中一叢數枝橫斜瘦硬形色真枯梅也雖巧
工造作所不能及根所附著如覆菌或云本質爲海水
所化如石蟹石蝦之類

石柏生海中一幹極細上有一葉宛是側柏扶疏無小
異根所附著如烏藥大抵皆化爲石矣此與石梅雖未
詳可以入藥否然皆奇物不可不志

志香

南方火行其氣炎上藥物所賦皆味辛而嗅香如沈
箋之屬世專謂之香者又美之所鍾也世皆云二廣
出香然廣東香乃自舶上來廣右香產海北者亦凡
品惟海南最勝人士未嘗落南者未必盡知故著其
說

沈水香上品出海南黎峒一名土沈香少大塊其次如
繭栗角如附子如芝菌如茅竹葉者佳至輕薄如紙者

入水亦沈香之節因久蟄土中滋液下流結而爲香採
時香面悉在下其背帶水性者乃出土上環島四郡界
皆有之悉冠諸番所出又以出萬安者爲最勝說者謂
萬安山在島正東鍾朝陽之氣香尤醞藉豐美大抵海
南香氣皆清淑如蓮花梅英鵝梨蜜脾之類焚一博投
許氛翳彌室翻之四面悉香至煤燼氣不焦此南海香
之辨也北人多不甚識蓋海上亦自難得省民以牛博
之於黎一牛博香一擔歸自差擇得沈水十不一二中
州人士但用廣州舶上占城眞臘等香近年又貴丁流

眉來者余試之乃不及海南中下品舶香往往腥烈不
甚腥者意味又短帶木性尾煙必焦其出海北者生交
趾及交人得之海外蕃舶而聚于欽州謂之欽香質重
實多大塊氣尤酷烈不復風味惟可入藥南人賤之
蓬萊香亦出海南卽沈水香結未成者多成片如小笠
及大菌之狀有徑一二尺者極堅實色狀皆似沈香惟
入水則浮剝去其背帶木處亦多沈水

鷓鴣班香亦得之於海南沈水蓬萊及絕好棧香中槎
牙輕鬆色褐黑而有白斑點點如鷓鴣臆上毛氣尤清

婉似蓮花

棧香出海南香如蝟皮栗蓬及漁簑狀蓋修治時雕鏤費工去木畱香棘刺森然香之精鍾於刺端芳氣與他處棧香隻別出海北者聚於欽州品極凡與廣東舶上生熟速結等香相埒海南棧香之下又有重漏生結等香皆下色

光香與棧香同品第出海北及交趾亦聚於欽州多大塊如山石枯槎氣麤烈如焚松檜曾不能與海南棧香比南人常以供日用及常程祭享

泥香出交趾以諸香草合和蜜調如薰衣香其氣溫磨自有一種意味然微昏鈍

香珠出交趾以泥香捏成小巴豆狀琉璃珠閒之綵絲貫之作道人數珠入省地賣南中婦人好帶之

思勞香出日南如乳香歷青黃褐色氣如楓香交趾人用以合和諸香

排草出日南狀如白茅香芬烈如麝香亦用以合香諸草香無及之者

檳榔苔出西南海島生檳榔木上如松身之艾蒨單熱

極臭交趾人用以合泥香則能成溫磨之氣功用如甲
香
檄欖香檄欖木脂也狀如黑膠飴江東人取黃連木及
楓木脂以爲欖香蓋其類出于檄欖故獨有清烈出塵
之意品格在黃連楓香之上桂林東江有此果居人采
香賣之不能多得純脂不雜木皮者爲佳
零陵香宜融等州多有之士人編以爲蓆薦坐褥性煖
宜人零陵今永州實無此香

志酒

余性不能酒士友之飲少者莫余若而能知酒者亦
莫余若也頃數仕于朝游王公貴人家未始得見名
酒使虜至燕山得其宮中酒號金蘭者乃大佳燕西
有金蘭山汲其泉以釀及來桂林而飲瑞露乃盡酒
之妙聲震湖廣則雖金蘭之勝未必能頡頏也

瑞露帥司公廚酒也經撫所前有井清烈汲以釀遂有
名今南庫中自出一泉近年只用庫井酒仍佳

古粹泉古粹本竇橫閒墟名以墟中泉釀酒旣熟不煮
埋之地中日足取出

老酒以麥麴釀酒密封藏之可數年士人家尤貴重每歲臘中家家造鮓使可爲卒歲計有貴客則設老酒冬鮓以示勤婚娶亦以老酒爲厚禮

志器

南州風俗猺雜蠻徭故凡什器多詭異而外蠻兵甲之製亦邊鎮之所宜知者

竹弓以熏竹爲之筋膠之制一如角弓惟揭箭不甚力黎弓海南黎人所用長弰木弓也以藤爲弦箭長三尺無羽鏃長五寸如茨菰葉以無羽故射不過三四丈然

中者必死

蠻弩諸峒猺及西南諸番其造作略同以硬木爲弓椿甚短似中國獵人射生弩但差大耳

猺人弩又名編架弩無箭槽編架而射也

藥箭化外諸蠻所用弩雖小弱而以毒藥濡箭鋒中者立死藥以蛇毒草爲之

蠻甲惟大理國最工甲冑皆用象皮胷背各一大片如龜殼堅厚與鐵等又聯綴小皮片爲披膊護項之屬製如中國鐵甲葉皆朱之兜鍪及甲身內外悉朱地閒黃

黑漆作百花蟲獸之文如世所用犀毗器極工妙又以
小白貝纍纍駱甲縫及裝兜鍪疑猶傳古貝冑朱纒遺
製云

黎兜鍪海南黎人所用以藤織爲之

雲南刀卽大理所作鐵青黑沈沈不銹南人最貴之以
象皮爲鞘朱之上亦畫犀毗花文一鞘兩室各函一刀
鞘以皮條纏束貴人以金銀絲

峒刀兩江州峒及諸外蠻無不帶刀者一鞘二刀與雲
南同但以黑漆雜皮爲鞘

黎刀海南黎人所作刀長不過一二尺鞘乃三四寸織
細藤纏束之柄端插白角片尺許如鴟鴞尾以爲飾

蠻鞞西南諸番所作不用韉但空垂兩木鐙鐙之狀刻
如小龕藏足指其中恐入榛棘傷足也後鞞斲木爲大
錢纍纍貫數百狀如中國騾驢鞞

蠻鞭刻木節節如竹根朱墨開漆之長纔四五寸其首
有鐵環貫二皮條以策馬

花腔腰鼓出臨桂職田鄉其土特宜鼓腔村人專作鞞
爲飾燒之油畫紅花紋以

銅鼓古蠻人所用南邊土中時有掘得者相傳爲馬伏波所遺其製如坐墩而空其下滿鼓皆細花紋極工緻四角有小蟾蜍兩人舁行以手拊之聲全似鞞鼓銃鼓獠人用狀如腰鼓腔長倍之上銳下侈亦以皮鞣植于地坐拊之

盧沙瑤人樂狀類簫縱八管橫一管貫之

胡盧笙兩江峒中樂

藤合屈藤盤繞成杵合狀漆固護之出藤梧等郡雞毛筆嶺外亦有兔然極少俗不能爲兔毫筆率用雞毛其鋒踉蹌不聽使

練子出兩江州洞大略似苧布有花紋者謂之花練土人亦自貴重

綵亦出兩江州洞如中國線羅上有徧地小方勝紋蠻氈出西南諸蕃以大理者爲最蠻人晝披夜臥無貴賤人有一番

黎幕出海南黎峒人得中國錦綵拆取色絲閒木絲挑織而成每以四幅聯成一幕

黎單亦黎人所織青紅閒道木縣布也桂林人悉買以

學海類編
卷之八
爲臥具

檳榔合南人既喜食檳榔其法用石灰或蜆灰并扶留藤同咀則不澀土人家至以銀錫作小合如銀鋌樣中爲三室一貯灰一貯藤一貯檳榔

鼻飲杯南人習鼻飲有陶器如杯盃旁植一小管若瓶嘴以鼻就管吸酒漿暑月以飲水云水自鼻入咽快不可言邕州人已如此記之以發覽者一胡盧也

牛角杯海旁人截牛角令平以飲酒亦古兕觥遺意蠻盃以木刻朱黑閒漆之侈腹而有足如敦甌之形

竹釜獠人所用截大竹筒以當鐺鼎食物熟而竹不燔蓋物理自爾非異也

戲面桂林人以木刻人面窮極工巧一枚或值萬錢

志禽

南方多珍禽非君子所問又余以法禁采捕甚急故不能多識偶於人家見之及有異聞者錄以備博物孔雀生高山喬木之上人探其雛育之喜臥沙中以沙自浴拘拘甚適雄者尾長數尺生三年尾始長歲一脫尾夏秋復生羽不可近自損人飼以豬腸及生菜惟不

食菘

鸚鵡近海郡尤多民或以鸚鵡爲鮓又以孔雀爲腊皆以其易得故也此二事載籍所未紀自余始志之南人養鸚鵡者云此物出炎方稍北中冷則發瘴噤戰如人患寒熱以柑子飼之則愈不然必死

白鸚鵡大如小鵝亦能言羽毛玉雪以手撫之有粉粘著指掌如蛺蝶翅

烏鳳如喜雀色紺碧頸毛類雄雞鬃頭有冠尾垂二弱骨各長一尺四五寸其杪始有毛羽一簇冠尾絕異大

略如鳳鳴聲清越如笙簫然度曲妙合宮商又能爲百蟲之音生左右江溪洞中極難得然書傳未之紀當由人罕識云

秦吉了如鸚鵡紺黑色丹味黃距目下連項有深黃文頂毛有縫如人分髮能人言比鸚鵡尤慧大抵鸚鵡如兒女吉了聲如丈夫出邕州溪洞中唐書林邑出結遼鳥林邑今占城去邕欽州但隔交趾疑卽吉了也

錦鷄又名金鷄形如小雉湖南北亦有之

山鳳凰狀如鵝鴈嘴如鳳巢兩江深林中伏卵時雄者

以木枝雜桃膠封其雌子巢獨畱一竅雄飛求食以飼
之子成卽發封不成則窒竅殺之此亦異物然未之見
也
翻毛雞翩翩皆翻生彎彎向外尤馴狎不散逸二廣皆
有
長鳴雞高大過常雞鳴聲甚長終日啼號不絕生邕州
溪洞中

翡翠出海南邕賀二州亦有腊而賣之
灰鶴大如鶴通身灰慘色去頂二寸許毛始丹及頸之

半亦能鳴舞

鷓鴣大如竹雞而差長頭如鶉身文亦然惟臆前白點
正圓如珠人采食之

水雀蒼色似鵲鴿飛集戶庭翩翩然與燕雀爲伍

志獸

獸莫巨于象莫有用於馬皆南土所宜余治馬政頗
補苴漏隙其說累牘所不能載姑著其略及畜獸稍
異者併爲一篇

象出交趾山谷惟雄者則兩牙佛書云四牙又云六牙

今無有
蠻馬出西南諸蕃多自毗那自杞等國來自杞取馬於
大理古南詔也地連西戎馬生尤蕃其制又高燥
大理馬爲西南蕃之最
果下馬土產小駟也以出德慶之瀧水者爲最高不逾
三尺駿者有兩脊骨故又號雙脊馬健而喜行
猴有三種金絲者黃玉面者黑純黑者面亦黑金絲玉
面皆難得或云純黑者雄金絲者雌又云雄能嘯雌不
能也猿性不耐著地著地輒瀉以死煎附子汁飲之卽

愈

蠻犬如獵狗警而獒

鬱林犬出鬱林州極高大垂耳拳尾與常犬異

花羊南中無白羊多黃褐白斑如黃牛又有一種深褐
黑脊白斑全似鹿

乳羊本出英州其地出仙茅羊食茅舉體悉化爲肪不
復有血肉食之宜人

縣羊出邕州溪洞及諸蠻國與朔方胡羊不異

麝香自邕州溪洞來者名土麝氣臊烈不及西蕃

火狸狸之類不一邕別有一種其毛色如金錢豹但其錢差大耳彼人云歲久則化爲豹其文先似之矣

風狸狀似黃猿食蜘蛛晝則拳曲如蝟遇風則飛行空中其溺及乳汁主大風疾奇効

懶婦如山豬而小喜食禾田夫以機軸織紝之器掛田所則不復近安平七源等州有之

山豬卽豪豬身有棘刺能振發以射人三二百爲羣以害禾稼州洞中甚苦之

石鼠專食山豆根賓州人以其腹乾之治咽喉疾効如

神謂之石鼠肚

香鼠至小僅如指擘大穴于柱中行地中疾如激箭

山獺出宜州溪洞俗傳爲補助要藥洞人云獺性淫毒山中有此物凡牝獸悉避去獺無偶抱木而枯洞獺尤

貴重云能解藥箭毒中箭者研其骨少許傳治立消一枚直金一兩人或求買但得殺死者功力甚劣

志蟲魚

蟲魚微物外薄于海者其類庸可既哉錄偶見聞者

萬一

珠出合浦海中有珠池蚤戶投水採蚌取之歲有豐耗
多得謂之珠熟相傳海底有處所如城郭大蚌居其中
有怪物守之不可近蚌之細碎蔓延于外者始得而采
車磔似大蚌海人磨治其殼爲諸玩物
蚌蛇大者如柱長稱之其膽入藥南人腊其皮刮去鱗
以鞞鼓蛇常出逐鹿食寨兵善捕之數輩滿頭插花趨
赴蛇蛇喜花必駐視漸近競拊其首大呼紅娘子蛇頭
益俛不動壯士大刀斷其首眾悉奔散遠伺之有頃蛇
省覺奮迅騰擲傍小木盡拔力竭乃斃數十人昇之一

村飽其肉

瑇瑁形似龜龜輩背甲十三片黑白斑文相錯鱗差以
成一背其邊裙闕闕齧如鋸齒無足而有四鬣前兩鬣
長狀如櫂後兩鬣極短其上皆有鱗甲以四鬣擢水而
行海人養以鹽水飼以小鱗俗傳甲子庚申日輒不食
謂之瑇瑁齋日其說甚俚
蜈蚣有極大者

青螺狀如田螺其大兩拳楷磨去麤皮如翡翠色雕琢
爲酒杯

鸚鵡螺狀如蝸牛殼磨治出精采亦雕琢爲杯

貝子海傍皆有之大者如拳上有紫斑小者指而大白

如玉

石蟹生海南形真是蟹云是海味所化理不可詰又有

石蝦亦其類

鬼蛺蝶大如扇四翅好飛荔枝上

黑蛺蝶大如扇橘蠹所化北人云元武蟬

嘉魚狀如小鮭魚多脂味極腴美出梧州火山人以為

鮓餉遠

蝦魚出灘水肉白而豐味似蝦而鬆美

竹魚出灘水狀似青魚味如鰕魚南中魚品如鯉鯽輩

皆有之而以蝦竹二魚爲珍

天蝦狀如大飛蟻秋社後有風雨則羣墮水中有小翅

人候其墮掠取之爲鮓

志花

桂林具有諸草花木牡丹芍藥桃杏之屬但培漑不

力存形似而已今著其土產獨宜者凡北州所有皆

不錄

上元紅深紅色絕似紅木瓜花不結實以燈夕前後開故名

白鶴花如白鶴立春開

南山茶葩萼大倍中州者色微淡葉柔薄有毛別自有一種如中州所出者

紅荳蔻花叢生葉瘦如碧蘆春末發初開花先抽一幹有大籜包之籜解花見一穗數十蕊淡紅鮮妍如桃杏花色蕊重則下垂如蒲萄又如火齊纓絡及剪綵鸞枝之狀此花無實不與草荳蔻同種每蕊心有兩瓣相竝

詞人托興曰比目連理云

泡花南人或名柚花春末開蕊圓白如大珠既折則似茶花氣極清芬與茉莉素馨相逼番人采以蒸香風味超勝

紅蕉花葉瘦類蘆箬心中抽條條端發花葉數層日拆一兩葉色正紅如榴花荔子其端各有一點鮮綠尤可愛春夏開至歲寒猶芳又有一種根出土處特肥飽如膽餅名膽餅蕉

枸那花葉瘦長略似楊柳夏開淡紅花一朶數十萼至

學海類編
秋深猶有之

史君子花蔓生作架植之夏開一簇一二十葩輕盈似海棠

水西花葉如萱草花黃夏開

裏梅花卽木槿有紅白二種葉似蜀葵采紅者連葉包裹黃梅鹽漬暴乾以薦酒故名玉修花粉紅色四季開象蹄花如梔子而葉小夏開至秋深素馨花比番禺所出爲少當由風土差宜故也茉莉花亦少如番禺以浙米漿日漑之則作花不絕可

耐一夏花亦大且多葉倍常花六月六日又以治魚腥水一漑益佳

石榴花南中一種四季常開夏中旣實之後秋深忽又大發花且實枝頭碩果罅裂而其旁紅英粲然併花實折釘盤筵極可玩

添色芙蓉花晨開正白午後微紅夜深紅

側金盞花如小黃葵葉似槿歲暮開與梅同時

志果

世傳南果以子名者百二十半是山野閒草木實猿

學海類編 卷之三
狙之所甘人強名以爲果故余不能盡識錄其識可食者五十五種

荔枝自湖南界入桂林纔百餘里便有之亦未甚多昭平出標核臨賀出綠色者尤勝自此而南諸郡皆有之悉不宜乾肉薄味淺不及閩中所產

龍眼南州悉有之極大者出邕州圍如當二錢但肉薄不能遠過常品爲可恨

饅頭柑近蒂起饅頭尖者味香勝可貯永嘉乳柑

金橘出營道者爲天下冠出江浙者皮甘肉酸不逮矣

絲李味甘美勝常品擘之兩片開如離核桃

石栗圓如彈子每顆有梗抱附之類杓柄肉黃白甘韌

似巴欖子仁附肉有白靨不可食發病北人或呼爲海

胡桃

龍荔枝殼如小荔枝肉味如龍眼木身葉亦似二果故名可蒸食不可生啖令人發癩或見鬼物三月開小白花與荔枝同時

木竹子皮色形狀全似大枇杷肉甘美秋冬開實

冬桃狀如棗深碧而光輒爛甘酸春夏熟

羅望子殼長數寸如肥阜又如刀豆色正丹內有二三
實煨食甘美

人面子如大梅李核如人面兩目鼻口皆具肉甘酸宜
蜜煎

烏欖如橄欖青黑色肉爛而甘木良葉水以二果焙
方欖亦橄欖類三角或四角出兩江州洞

椰子木身葉悉類椶櫚檠榔之屬子生葉間一穗數枚
枚大如五升器果之大者謂惟此與波羅蜜等耳皮中
子殼可爲器子中瓢白如玉味美如牛乳瓢中酒新者

極清芳久則渾濁不堪飲

蕉子芭蕉極大者凌冬不凋中抽榦長數尺節節有花
花褪葉根有實去皮取肉軟爛如綠柿極甘冷四季實
土人或以飼小兒云性涼去客熱以梅汁漬暴乾按令
扁味甘酸有微霜世所謂芭蕉乾者是也又名牛子蕉
雞蕉子小如牛蕉亦四季實

茅蕉子小如雞蕉尤香嫩甘美秋初實

紅鹽草果取生草荳蔻入梅汁鹽漬令色紅暴乾以薦

酒

鸚哥舌卽紅鹽草果之珍者實始結卽頻取紅鹽乾之纔如小舌

八角茴香北人得之以薦酒少許咀嚼甚芳香出左右江州洞中

餘甘子多販入北州人皆識之其木可以制器五梭子形甚詭異瓣五出如田家碌碡狀味酸久嚼微恬閩中謂之羊桃

黎朦子如大梅復似小橘味極酸波羅蜜大如冬瓜外膚礪砢如佛髻削其皮食之味極

甘子練悉如冬瓜生大木上秋熟

柚子南州名臭柚大如瓜人亦食之皮甚厚打碑者卷皮蘸墨以代氈刷宜墨而不損紙極便于用此法可傳但北州無許大柚耳

櫓罟子大如半升碗諦視之數十房攢聚成毬每房有縫冬生青至夏紅破其瓣食之微甘

槎擦子如錐栗肉甘而微澀

地蠶生土中如小蠶又似甘露子

赤柚子如橄欖皮青肉赤以下竝春實

火炭子如烏李

山韶子色紅肉如荔枝以下八種並夏實

山龍眼色青肉如龍眼

部諦子色黃如大石榴

木賴子如淡黃大李

粘子如指面大褐色

羅冕子如橄欖其皮七重

千歲子如青黃李味甘

赤棗子如酸棗味酸

藤韶子大如鳧卵柿以下十三種並秋實

古米子殼黃中有肉如米粒

殼子如青梅味甘

藤核子生白藤上如小蒲桃

木連子如胡桃紫色

蘿蒙子黃如大橙柚

毛栗如橡栗

特乃子狀似榧而圓長端正

不納子似黃熟小梅絕易爛爛即破肉附核可為經珠

似菩提子

羊矢子色狀全似羊矢味亦不佳

日頭子狀如櫻桃色如蒲桃穗

秋風子色狀俱如棟子

黃皮子如小棗

朱圓子正圓深紅狀如棟子以下六種皆冬實

匾桃大如桃而匾色正青

粉骨子皮黃色如粉

塔骨子扁如大橘皮裏空虛

布衲子似李而黃

黃肚子如小石榴

志草木

異草瑰木多生窮山荒野其不中醫和匠石者人亦不采故余所識者少惟竹品乃多桀異併附于錄

桂南方奇木上藥也桂林以桂名地實不產而出于賓宜州凡木葉心皆一縱理獨桂有兩紋形如圭製字者意或出此葉味辛甘與皮無別而加芳美人喜咀嚼之榕易生之木又易高大可覆數畝者甚多根出半身附

幹而下以入土故有榕木倒生根之語禽鳥銜其子寄生他木上便蔚茂根下至地得土氣久則過其所寄沙木與杉同類尤高大葉尖成叢穗少與杉異
桄榔木身直如杉又如椶櫚有節似大竹一幹挺上高數丈開花數十穗綠色

思儻木生兩江州洞堅實漬鹽水中百年不腐
臙脂木堅緻色如臙脂可斲作出融州及州洞桂林屬縣亦有之

雞桐葉如揀其葉煮湯療足膝疾

龍骨木色翠青狀如枯骨

風膏藥葉如冬青治太陽疼頭目昏眩

南漆如稀飴氣如松脂霑霑無力

蕩竹葉大且密略如蘆葦

澀竹膚麤澀如木工所用砂紙可以錯磨爪甲

人面竹節密而凸宛如人面人采爲拄杖

釣絲竹類蕩竹枝極柔弱

斑竹中有墨暈江浙閒斑竹直一淚痕無暈也

貓頭竹質性類筍竹

桃枝竹多生石上葉如小椶櫚人以大者為杖
笏竹刺竹也芒棘森然
箭竹山中悉有

宿根茄茄木不凋明年結實

銅鼓草其實如瓜療瘡傷毒

大蒿容梧道中久無霜雪處年深滋長大者可作屋柱

小亦中肩輿之杠

石髮出海土纖長如絲縷

扁菜細如符帶扁如薤菜長一二尺

都管草一莖六葉辟蜈蚣蛇

花藤錠以為器用中有花紋

胡蔓藤毒草也揉其草漬之水入口即死

雜志

嶠南風土之異宜錄以備博聞而不可以部居謂之

雜志

雪南州多無雪霜草木皆不改柯易葉獨桂林歲歲得
雪或獵中三白然終不及北州之多靈川興安之閒兩
山蹲踞中容一馬謂之嚴關朔雪至關輒止大盛則度

學海類編 送至桂林城下不復南矣

風廣東南海有颶風西路稍北州縣悉無之獨桂林多風秋冬大甚拔木飛瓦晝夜不息俗傳朝作一日止暮七日夜半則彌旬去海猶千餘里非颶也土人自不知其說余試論之桂林地勢視長沙番禺在千丈之上高而多風理固然也

癸水桂林有古記父老傳誦之略曰癸水繞東城永不見刀兵癸水灑江也

瘴二廣惟桂林無之自是而南皆瘴鄉矣瘴者山嵐水

毒與草莽沴氣鬱勃蒸熏之所爲也其中人如瘡狀治法雖多常以附子爲急須不換金正氣散爲通用邕州兩江水上尤惡一歲無時無瘴春曰青草瘴夏曰黃梅瘴六七月曰新禾瘴八九月曰黃茅瘴土人以黃茅瘴爲尤毒桂林舊不知的實所在城北五里有尋丈小坡立石其上刻曰桂嶺賀州自有桂嶺縣相傳始名嶺在其地今小坡非也

俗字邊遠俗陋牒訴券約專用土俗書桂林諸邑皆然今姑記臨桂數字雖甚鄙野而偏傍亦有依附衺音不

長也閏

音穩

坐于門中穩也奎

音亦穩

大坐亦穩也仆

音小

兒也柔

音動

人瘦弱也歪

音終

人亡絕也否

音臘

不能舉足也

妖

音大

女大及姊也岳

音礪

山石之巖窟也門

音櫃

門橫關也

他不能悉紀余閱訟牒二年習見之大理國閒有文書

至南邊及商人持其國佛經題識猶有用囡字者囡武

后所作國字也唐書稱大禮國今其國止用理字

捲伴南州法度疏略婚姻多不正村落強暴竊人妻女

以逃轉移他所安居自若謂之捲伴言捲以為伴侶也

已而復為後人捲去至有歷數捲未已者其舅姑若前

夫訪知所在詣官自陳官為追究往往所謂前夫亦是

捲伴得之後為後人所捲惟其親父母兄弟及初娶者

所訴即歸始初被捲之家

草子即寒熱時疫南中吏卒小民不問病源但頭痛體

不佳便謂之草子不服藥使人以小錐刺脣及舌尖出

血謂之挑草子實無加損于病必服藥乃愈

志蠻

廣西經略使所領二十五郡其外則西南諸蠻蠻之

區落不可殫記姑記其聲問相接帥司常有事于其

地者數種曰羈縻州洞曰徭曰蠻曰黎曰蜑通謂之蠻

羈縻州洞隸邕州左右江者爲多舊有四道儂氏謂安平武勒忠浪七源四州皆儂姓又有四道黃氏謂安德歸樂露城田州皆黃姓又有武侯延跋石門感德四鎮之民自唐以來內附分析其種落大者爲州小者爲縣又小者爲洞國朝開拓浸廣州縣洞五十餘所推其雄長者爲首領藉其民爲壯丁其人物獷悍風俗荒怪不可盡以中國教法繩治姑羈縻之而已有知州權州監

州知縣知洞其次有司發遣權發遣之屬謂之主戶餘民皆稱提陀猶言百姓也其田計口給民不得典賣惟自開荒者由己謂之祖業計口分田知州別得養印田猶圭田也權州以下無印記者得蔭免田旣各服屬其民以攻剽山獠及博買嫁娶所得生口男女相配給田使耕教以武技世世隸屬謂之家奴亦曰家丁民戶強壯可教勸者謂之田子田丁亦曰馬前牌總謂之洞丁今黃姓尙多而儂姓絕少智高亂後儂氏善良許從國姓今多姓趙氏有舉洞純一姓者婚媾不以爲嫌會豪

或娶數妻皆曰媚娘宜州管下亦有羈縻州縣十餘所
其法制尤疏幾似化外其尤者曰南丹州待之又與他
州洞不同特命其首領莫氏曰刺史月支鹽料及守臣
供給錢其說以謂宜州徼外卽唐黃家賊之地崇建南
丹使控制之莫氏家人亦有時相攻奪今刺史莫延甚
逐其弟延廩而自立延廩奔朝廷謂之出宋

凡州洞歸明者皆稱

宋出

獠本五溪槃瓠之後其壤接廣右者靜江之興安義甯
古縣融州之融水懷遠縣界皆有之生深山重溪中椎
髻跣足不供征役各以其遠近爲伍

獠在江右溪洞之外俗謂之山獠依山林而居無酋長
版籍蠻之荒忽無常者也以射生食動而活蟲豸能蠕
動者皆取食無年甲姓名一村中惟有事力者曰郎火
餘但稱火舊傳其類有飛頭鑿齒鼻飲白衫花面赤禪
之屬二十一種今在江西南一帶甚多殆有餘種也
蠻南方曰蠻今郡縣之外羈縻州洞雖故皆蠻地猶近
省民供稅役故不以蠻命之遇羈縻則謂之化外真蠻
矣區落連亘接于西戎種類殊詭不可勝記今志其近

桂林者宜州有西南蕃大小張大小王龍石滕謝諸蕃地與牂牁接人椎髻跣足或著木履衣青花班布以射獵讎殺爲事又南連邕州南江之外者羅殿自杞等以國名羅孔特磨白衣九道等以道名而峩州以西別有酋長無所統屬者蘇綺羅坐夜面計利流求萬壽多嶺阿悞等蠻謂之生蠻酋自謂太保大抵與山獠相似但有首領耳羅殿等處乃成聚落亦有文書公文稱守羅殿國王其外又有大蠻落西曰大理東曰交趾大理南詔國也交趾古交州治龍編爲又安南都護府

黎海南四郡隲上蠻也隲直雷州由徐開渡半日至隲之中有黎母山諸蠻環居四旁號黎人山極高常在霧靄中黎人自鮮識之久晴海氛清廓時或見翠尖浮半空云蠻皆椎髻跣足插銀銅錫釵婦人加銅環耳墜垂肩女及笄卽黥頰爲細花紋謂之繡面女旣黥集親客相慶賀惟婢獲則不繡面四郡之人多黎姓蓋其裔族而今黎人乃多姓王

蜃海上水居蠻也以舟楫爲家採海物爲生且生食之入水能視合浦珠池蚌蛤惟蜃能沒水採取旁人以繩

繫其腰繩動搖則引而上先煮毳衲極熱出水急覆之
 不然寒慄而死或遇大魚蛟鼉諸海怪為鬻鬣所獨往
 往潰腹折支人見血一縷浮水面知蚤死矣

桂海虞衡志終



成都遊宴記

宋 蘇軾 撰

成都遊賞之盛甲於西蜀蓋地大物繁而俗好娛樂
凡太守歲時宴集騎從雜沓車服鮮華倡優鼓吹出
入擁導四方奇技幻怪百變序進于前以從民樂歲
率有期謂之故事及期則士女櫛篋輕裘袷服扶老
攜幼闐道嬉遊或以坐具列于廣庭以待觀者謂之
遨牀而謂太守爲遨頭宋朝以益州重地嘗謀帥以
命宋公祁宰相對曰蜀風奢侈祁喜遊宴恐非所宜

宋朝不從卒遣之公先奉詔修唐書因以書局自隨
自成都每宴罷盥漱闢寢門垂簾然二椽燭媵婢夾
侍和墨伸紙望之者知公修唐書若神仙焉嘗宴于
錦江偶微寒命索半臂諸婢各送一枚公視之慮有
厚薄之嫌訖不服忍冷以歸舊俗傳誇以爲談本田
公況嘗爲成都遨樂詩二十一章以紀其實而薛公
奎亦作何處春遊好詩十章自號薛春遊以從其
俗且欲以易尹京之舊稱公知開府專以嚴治人謂
之薛出油此皆可以想承平之遺風也至清獻公爲

記乃曰曩時宴會皆牙校掌之蓋榷酤之利有餘人
樂于爲役公帑歲入亡慮千萬貫有奇自新法頒行
酒坊爲官所鬻牙校雖得券錢不足自瞻乃者議置
成都市易務方游觀時人情瞿然減常歲之半及浣
花後始開罷去復朋聚游江今公使錢歲給三萬貫
常廩廩慮不足譬之巨人以狹衾寢覆趾則露肩擁
左則闕右甚可笑也今盤饌比舊從省樂優之給亦
復過殺設遂廢之則非天子所以付畀一偶惠保遠
人之意而小民之鬻肴果者但營慕供藉以爲養此

游宴之不可廢也觀公此言則蜀人之貧富欣戚可以知政矣今以元日爲始而第其事一曰惠風正月元日郡人曉持小綵幡遊安福塔粘之盈柱若鱗次然以爲厭禳懲咸平之亂也塔上然燈梵唄交作僧徒駢集太守詣塔前張宴晚登塔眺望焉命三萬貫二日出東郊早宴移忠寺舊名碑婁院晚宴大慈寺清獻公記云宴罷妓以新詞送茶自宋公祁始蓋臨邛周之純善爲歌詞嘗作茶詞授妓首度之以奉公後遂因之

五日五門蠶市蓋蠶叢氏始爲之俗往往呼爲蠶叢太守卽門外張宴國言今限早宴

上元節放燈舊記稱唐明皇主元京師放燈燈甚盛葉法善奏曰成都燈亦盛遂引帝至成都市酒于富春坊此方外之言存而勿論咸通十年正月二日街坊點燈張樂晝夜喧闐蓋大中承平之餘風由此言之則唐時放燈蓋不獨上元也蜀王孟昶時閒亦有放燈無定日宋開寶二年命明年上元放燈三夜自是歲以爲常十四十五十六三日皆早宴大慈寺晚宴五門樓甲夜觀

山棚變燈其斂散之遲速惟太守意也如繁雜綺羅街
道燈火之盛以昭覺寺爲最又爲錢燈會會始于張公
詠蓋燈夕二都監戎服分巡以察姦盜旣罷故作宴以
勞焉通判主之就宣詔亭或涵虛亭舊以十七日今無
定日仍就府治專以宴監司也
二十三日聖壽寺前蠶市張公詠始卽寺中爲會使民
鬻農器太守先詣寺之都安王祠奠獻然後就宴舊出
萬里橋登樂俗園亭今則早宴於祥符寺晚宴於信相
院日

二十八日俗傳爲保壽侯誕日出竿橋門卽侯祠奠拜
次詣淨眾寺邠國杜丞相祠奠拜畢事會食晚宴大智
院

二月二日踏青節初郡人遊賞散在四郊張公詠以爲
不若聚之爲樂乃以是日出萬里橋爲綵舫數十艘與
賓僚分乘之歌吹前導號小游江蓋指浣花爲大游江
也士女駢集觀者如堵晚宴于寶歷寺公爲詩有曰春
游千萬家美人顏如花三三兩兩映花立飄飄似欲乘
烟霞公鐵心石腸乃賦此麗詞哉後以爲故事清獻公

學海類編 卷之四 遊覽
爲記時綵舫至增數倍今不然矣八日觀街藥市早宴
大慈寺之設廳晚宴金繩院

三月三日出北門宴學射山旣罷後射弓蓋張伯子以
是日卽此地上升巫覡賣符于道遊者佩之以宜蠶辟
災輕裾小蓋照爛山阜晚宴于萬歲池亭泛舟池中九
日觀街藥市早晚宴如二月八日二十一日出大東門
宴海雲山鴻慶寺登眾春閣觀摸石開元二十三年靈
智禪師以是日歸寂邦人敬之入山游禮因而成俗山
有小池士女探石其中以占求子之祥旣又晚宴于大

慈寺之設廳二十七日大西門睿聖夫人廟前蠶市初
在小市橋田公以禱雨而應移于廟前太守先詣諸廟
奠拜宴于眾淨寺晚宴大智院寒食出大東門早宴移
忠院晚宴大慈寺設廳曩時寒食太守先設酒饌于近
郊祭鬼物之無依者謂之遙享後置廣仁院以葬死而
無主者乃遣官臨祭之而民間上冢者各儀集于郊外
大僖二年趙公稹嘗開西樓亭榭俾士庶遊觀自是每
歲寒食闢園張樂酒壚花市茶房食肆過于蠶市士女
從觀太守會賓僚凡浹旬此最府廷遊宴之盛近歲自

學海類編 卷之五 遊覽
二月卽開園逾月而後罷酒人利其酒息或請于府展其日府尹亦許之

四月十九日浣花佑聖夫人誕日也太守出竿橋門至梵安寺謁夫人祠就宴于寺之設廳旣宴登舟諸軍騎射倡樂前導泝流至百花潭觀水民嬉競渡官舫民船乘流上下或幕帟水濱以事遊賞最爲出郊之勝清獻公託云往昔太守分遣使臣以酒均給游人隨所會之數以爲斗升之節自公使限錢茲例遂罷以遠民樂太平之盛不可遽廢以孤其心乃以行隨公使錢釀酒界

之然不逮昔日矣

五月五日宴大慈寺設廳醫人鬻艾道人賣符朱索綵縷長命辟災之物筒飯角黍莫不咸在

六月初秋日會監司中伏日會職官以上末伏日會府縣官皆就江瀆廟設廳初文潞公建設廳以伏日爲會避暑自是以爲常早宴罷泛舟池中復出就廳晚宴觀者臨池張飲盡日爲樂趙清獻公使限錢但爲初伏會今因之

七月七日晚宴大慈寺設廳暮登寺門樓觀錦江夜市

學海類編 卷之六 遊覽
乞巧之物皆備焉十八日大慈寺散孟蘭盆宴于寺之
設廳宴已就華嚴閣下散

八月十五日中秋玩月舊宴于西樓望月于錦亭今宴
于大慈寺

九月九日玉局觀藥市宴監司賓僚于舊宣詔堂晚飲
于五門凡二日官爲幕帟棚屋以事游觀或云有恍惚
遇仙者

冬至節宴于大慈寺後一日早宴金繩寺晚宴大慈寺
清獻公記云至前一日大守領客出北門石魚橋具樽

豆觀樵已乃卽天長觀晚宴蓋文潞公始爲之後復罷

學海類編

卷

卷之

信

遊覽

五編 詩曰 天昇 麟 鳳 文 部

六 游 覽

滇記

明 新都楊 慎用修編

滇城未通中國之先有低牟苴者居永昌哀牢之山麓

今金齒地有婦曰沙壹浣絮水中觸沈木若有感是生九男

曰九隆族種類滋長支裔蔓衍竊據土地散居谿谷分

為九十九部其渠酋有六各號為詔夷語謂詔為上其

一曰蒙舍詔今蒙化府其二曰浪施詔今浪穹縣其三曰鄧賧詔

今鄧州其四曰施浪詔今浪穹縣其五曰麼些詔今麗江府

其六曰蒙雋詔今建昌兵將不能相君長至漢有仁果時

九隆八族之四世孫也強大居昆彌川今白崖定西嶺傳十七

世至龍祐那當蜀建興三年諸葛武侯南征雍闓師次

白崖川獲闓斬之封龍祐那為會長賜姓張氏割永昌

益州地置雲南郡於白崖諸夷慕武侯之德漸去山林

徙居平地建城邑務農桑諸部於是始有姓氏龍祐那

之十六世孫曰張樂進求遜位於蒙氏考其時蓋唐世

也張氏或稱昆彌國或稱白國或稱建甯國其年系莫

可推詳

蒙氏始興曰細奴羅九隆五族牟苴篤之二十六世孫

也耕於巍山之麓數有神異孳牧繁息部眾日盛代張

氏立國號曰封民蒙氏偽稱南詔實唐貞觀三年也遷

居瓏玕圖山今蒙化及高宗時遣子入侍朝命授細奴羅

以巍州刺史死偽諡高祖又稱奇王子羅晟嗣

羅晟僭立當高宗上元元年至睿宗景雲中姚州蠻先

附吐蕃御史李知古請兵擊降之築城置州縣重稅賦

因誅其豪雋掠其子女為奴婢羣蠻怨怒引吐蕃攻知

古殺之於是姚雋路絕晟猶奉唐正朔死偽諡世宗子

晟羅皮嗣

晟羅皮之立當元宗先天元年立孔子廟於國中死諡
威成王子皮羅閣嗣

皮羅閣之立當元宗開元十六年受唐冊封爲雲南王
賜名歸義於是南詔浸强大而五詔微弱皮羅閣因仲
夏二十五日祭先之期建松明爲樓以會五詔宴醉後
羅閣佯下樓擊鼓舉火焚樓五詔遂滅閣賂劍南節度
使求合五詔爲一朝廷許之於是盡有雲南之地因破
吐蕃卒爲邊患不可復制既併五詔乃卜太和形勝左
洱水右蒼山山海之交結於子午遂築太和城自蒙舍

徙居之立上下二關曰龍首曰龍尾連陷遼川永昌石
鼓沙追賧龍佉賧後遣其孫鳳伽異入朝唐授鴻臚少
卿妻以宗女賜樂一部南詔於是始有中國之樂死子
閣羅鳳嗣

閣羅鳳之立以天寶八年故事酋長謁都督偕妻子行
鳳挈家至雲南太守張乾陀皆私之復多徵求鳳怒反
攻雲南殺乾陀取夷州三十二陷巽州獲唐西瀘令鄭
回拜清平官即其國丞相也天寶十年夏四月庚寅劍南節度
使鮮于仲通將命致討鳳伽異及段儉魏逆戰於西洱

河唐兵死者六萬人仲通僅以身免封儉魏為清平賜名段忠國以旌之遂臣於吐蕃吐蕃封之為東帝刻碑國門之外明叛唐非得已也僭國號曰大蒙始建年號曰贊普鐘十三年劍南留後李宓將兵擊之為蒙氏所誘全軍沒焉唐益發兵竟不能克前後死者二十萬人南詔自是始與中國隔絕矣代宗大歷十四年死偽諡神武子鳳伽異未嗣而死孫異牟尋立僭改元贊普鐘七長壽十一異牟尋以唐代宗大歷十四年嗣立有智數善撫眾居史城史城今喜州也連兵吐蕃入寇唐神策都將李晟擊破之

異牟尋懼改城牟咩咩今大理自稱曰

日東王僭封五嶽四瀆并立祠三皇廟春秋致祭以國

界內點蒼山為中嶽東川界江雲露松外龍山為東嶽

在今祿勸州一名絳雲露山一名雲龍山有十二峰皆峭拔其山有共命鳥穴銀生部日界蒙

樂山為南嶽在今者樂甸又名無量山其山千仞有殿搖柱自空中來天帝娶天女處永

昌騰越界高黎共山為西嶽在今騰衝一名崑崙隅東臨濃江西臨龍川左右有

平川名為窮甸草卉貫四敘不凋瘴氣最惡冬雪至春方蠲夏秋窮甸炎熾商賈愁怨為之謠曰冬時欲歸來

高黎其上雪夏秋欲歸來囊中資糧絕麗江界玉龍山為北

嶽在今麗江一名聳雪山其山九峰雪貫四時玉立以萬仞千里望之若在咫尺與蜀松州諸山相接也

黑惠江瀾滄江路江麗江爲四瀆接點蒼之顛漆汨河
之水立官號曰九爽三托其地東至於銅柱鐵橋蟠桃
玉榆東南至於交趾南至於驃國木落山西至於太石
西北至於吐蕃北至於神川東北至於黔巫八方之地
屬以八演從中國教令都曰苴咩別都曰善闡皆中國
降人爲之經畫也德宗貞元三年鄭回說以大義令復
歸唐異牟尋然之會西川節度使韋皋招撫羣蠻尋因
求內附而猶結好吐蕃皋乃爲書遺尋叙其歸化之誠
轉至吐蕃吐蕃疑之異牟尋歸附之志益堅九年上表

請絕吐蕃復臣於唐十年自將數萬人襲吐蕃大破之
遣其弟獻圖納貢及吐蕃所頒金印請復號南詔唐以
其功遣使冊之賜銀窠黃金印王北面跪受之宴使者
出元宗所賜器物指老笛工歌女曰皇帝所賜龜茲惟
二人在耳使者曰南詔當深思祖考子孫勿替盡忠皇
唐對曰敢不敬使者之命死僞諡考恆改元二見龍子
尋閣勸嗣

尋閣勸以唐德宗貞元十五年立死子勸龍晟立

僞諡孝文

改元應道

勸龍晟以唐永貞元年立淫虐不道其臣嵯顛殺之而立其弟勸利晟諡曰幽改元龍興

勸利晟以唐憲宗元和元年立死偽諡靖王子晟豐祐立改元全義

晟豐祐以穆宗長慶四年立趨敢善用其下文宗太和三年西川節度使杜元穎不恤士卒有流入蠻境者蠻衣食之由是盡以得蜀之虛實與其嵯顛遂謀入寇以蜀卒爲鄉道襲陷邛戎巂三州引兵徑入成都取諸經籍大掠子女工技數萬人及珍貨而還南詔工技文織

自是與中國埒矣豐祐乃遣使上表請罪元穎朝廷以李德裕代之德裕保障有方索南詔所掠百姓得四千人豐祐死偽諡昭成子世隆立改元二保和天啓

世隆之立以唐武宗會昌十三年初韋皋開蜀清溪道以通羣蠻入貢又選子弟聚之成都教之書數以羈縻之而軍府不時給其餼須南詔因是不肯入貢及世隆立朝廷以其名同元宗諱不行冊禮諭令更名謝恩然後遣使會世隆寇巂州事遂寢世隆乃僭稱皇帝懿宗咸通三年西寇安南四年寇交趾殺虜幾十五萬人畱

皇清類編 卷六 遊覽
兵二萬使其將楊思縉據之谿洞夷獠皆降五年寇邕
州敗還七年節度使高駉大破之復定交趾十年世隆
傾國入寇陷犍爲及黎雅嘉三州十一年進攻成都不
克引還僖宗乾符元年復寇西川陷黎州入寇邛峽關
勝負不常二年攻雅州聞高駉改西川遣使請和駉發
兵追至大渡河殺獲甚眾擒其酋長數十人四年復寇
越巂死於景淨寺自世隆嗣立以來爲邊患殆二十年
中國爲之虛耗而其國亦弊僞諡景莊皇帝子隆舜嗣
改元建極

隆舜

通鑑作法誤也南詔名皆父子
相承世隆之子曰隆舜近是

之立以僖宗乾符

四年性好畋獵酣宴委國事於其臣是歲請和許之又
送請和親廣明元年遣宗正少卿李龜年充使中和元
年上表款附三年以宗室女妻之後內嬖失道爲其臣
楊登所弑僞諡宣武子舜化真嗣改元二貞明嗟耶
舜化真之立以唐昭宗乾甯四年改元中興上書於唐
唐欲報以詔王建言小夷不足辱詔書臣在西南彼何
敢犯塞從之立四年其臣鄭買嗣奪之而滅其國追諡
孝哀蒙氏自細奴羅至舜化真十有三世立三百十年

而爲鄭氏

鄭買嗣本唐鄭回之後世爲蒙氏清平唐昭宗光化五年既滅蒙氏而自立改國號曰大長和改元曰安國死僞諡德桓子閔嗣立攻蜀黎州王建發兵大破之俘斬數萬級溺死數萬人求婚於南漢漢主以會城公主妻之改元五曰始元曰天瑞景星曰安和曰貞祐曰初歷死僞諡肅文子隆亶嗣立改元天應未幾爲東川節度使楊干眞所殺鄭氏三傳歷年二十有六而爲趙氏趙氏名善政爲封氏清平楊干眞既殺滅鄭氏遂拔善

政而立之後唐明宗之天成三年也改國號曰大天興立僅十月干眞又奪之而爲楊氏

楊氏名干眞既奪趙氏而有蒙國改國號曰大義甯改元曰尊聖貪虐無道中外咸怨通海節度使段思平興師問罪干眞不能禦走死楊氏立僅二年而段氏興焉段氏之先武威郡人有名儉魏者佐蒙氏有功賜名忠國擢清平官六傳而生思平思平生有異兆楊干眞忌之使人索捕思平逃匿得奇戟於品甸波犬村又得神驥於葉鏡湖

在雲南縣正南大波鋪是也

飢摘野桃剖之核膚有文

日青昔思平拆之曰青乃十二月昔乃二十一日今楊氏政亂吾當以是日舉義乎遂借兵東方黑爨松爨三十七部皆助之眾至河尾是夕思平夢人斬其首又夢玉瓶耳缺又夢鏡破懼不敢進兵其軍師董迦羅曰三夢皆吉兆也公爲大夫夫去首爲天天子兆也玉瓶去耳爲王王者兆也鏡中有影如人有敵鏡破則無影無影則無敵矣三夢皆吉兆也思平乃決明旦引兵欲渡莫知所從見江尾一婦被瓔而浣者指曰人從我江尾馬從三沙矣爾國名大理從之得濟既逐楊氏而有蒙

國遂改國號曰大理改元曰文德時後晉天福二年也死僞諡太祖傳子思英立未幾死僞諡文經武緯皇帝國人立其叔思良思良以後晉開運三年改元至治死僞諡
傳子思聰

思聰以後周廣順三年立改元三曰明德廣德聖德死

僞諡

傳於素順

素順於思聰未知何屬也

素順以宋太祖建隆四年立時王全斌既平蜀欲因兵威取滇以圖進於上太祖鑑唐之禍基於南詔以玉斧畫大渡河曰此外非吾有也由是雲南三百年不通中

國段氏得以睨臨熒爨以長世焉素順十七年改元明
正死偽諡應道皇帝傳子素英

素英以宋太宗雍熙二年立改元五曰廣明明應明聖
明德明治死偽諡昭明傳於素廉

素廉以宋真宗祥符二年立改元二曰明啓乾興死偽
諡敬明傳於素隆

素隆以宋大禧二年立改元曰明通天聖避位爲僧死
偽諡秉義傳於素貞

素貞以宋仁宗天聖四年立改元正治死偽諡聖德傳

於素興

素興以宋慶歷元年立改元二聖明天明以無道國人
廢之而立思廉

思廉以宋慶歷四年立皇祐中廣西儂智高掠廣州敗
走大理狄青募死士使大理求之會智高已死於大理
函其首至京師段氏至是始聞名於中國思廉立三十
一年改元四曰保安政安政德 死偽諡世宗傳子

連義

連義以宋熙甯八年立改元二曰上德廣安爲其臣楊

義貞所弑楊義貞篡立自號廣安皇帝凡四年段氏臣岳侯高智昇遣子昇大起東方兵討滅之而立段壽輝

壽輝連義之從子

壽輝立二年改元曰上明傳於正明

正明以宋元豐五年立改元三曰保立建安天祐避位爲僧時國人皆歸心高氏遂奉高昇太爲主而段氏中絕

高昇太有功段氏爲國人所立以宋哲宗之元符二年立國改國號曰大中國改元上治臨終屬其子太明日段氏不振國人推我我不得已從之今其子已長可還

其故物爾後人勿效尤也太明遵其遺言求段氏餘子正淳立之而段氏復興號曰後理國高氏世相之賞罰政令皆由之國人稱爲高國主波斯崑崙諸國來貢大理者皆先謁相國焉

正淳復國改元天授以高太明爲相高太連爲柵主遣太連朝宋求經籍得六十九家立十三年再改元曰開明文安避位爲僧傳子正嚴死僞諡中宗

正元以宋徽宗大觀二年立四十年改元四曰日新永嘉保天廣運避位爲僧傳子正興死僞諡憲宗

正興以宋高宗紹興十七年立改元四永貞太寶龍興
盛明避位爲僧傳子智興死僞諡景宗

智興以宋孝宗乾道八年立改元五日利貞盛德嘉會
元亨安定死僞諡宣宗傳子智連

智連以宋甯宗慶元六年立改元鳳歷死僞諡享天傳
弟智祥

智祥以宋甯宗開禧元年立改元天開仁壽死僞諡神
宗傳子祥興

祥興以宋理宗嘉熙二年立改元道隆甲辰元兵攻之
高禾逆戰敗死宋遣使祭之祥興死僞諡孝義傳子興
智

興智以元憲宗元年立改元天定壬子歲元忽必烈將
兵擊之分三道進自臨洮經行山谷二千餘里浮金沙
江以革囊濟進薄大理興智及高太祥拒戰大敗祥興
奔善闡太祥就擒不屈斬於五華樓下時白日當午忽
雲起雷震世祖異之曰忠臣也遂虜興智滅其國段氏
自思平至興智二十二主歷三百五十年

元旣滅段氏而有其地得五城八府蠻郡三十有七設

大理都元帥府仍錄段氏子姓世守其土赦興智封爲
摩訶羅嗟管領八方興智死元季亂中原多故段氏復
據之於是有十一總管出焉

一代總管曰信苴段實元中統二年入覲世祖嘉之賜
璽書令總管大理善闡會川建昌永昌騰越諸郡以功
累授行省參政以攻石城今靖曲及仁德府今尋甸功錫虎
符爲總管

二代總管信苴段忠至元中隨元帥伐西林破會川通
善闡平休林武定緬甸之役皆有功授金齒宣慰兼掌

軍民萬戶府

三代總管信苴段慶元封爲宣武將軍妻以公主入朝
歸授雲南省參政

四代總管信苴段正

五代總管信苴段隆

六代總管信苴段俊

七代總管信苴段義

八代總管信苴段光時元大德中中原板蕩梁王以元
宗室鎮善闡與段氏分域構隙至大二年梁王大破光

兵光將高蓬守羅那關梁王密招之不從乃賂蓬庖人刺蓬以其首獻梁王王并庖人戮之至治元年玉案山產小赤犬羣吠徧野占云天拘墜地爲赤犬其下有大軍覆境又時雨鐵民舍山石皆穿人物值之多斃謠俗號曰鐵雨

九代總管信苴段功初襲爵爲蒙化知府至正十二年繼立爲總管癸卯明玉珍自楚入蜀據之分兵四掠號曰紅巾明王珍自將紅巾三萬攻雲南梁王及憲司官皆奔威楚諸部悉亂功謀於員外楊淵海淵海卦之吉

乃進兵至呂閣敗紅巾於闕灘江殺獲千計紅巾收合餘衄再戰復勝殺段氏驍酋鐵萬戶紅巾屯古田寺段氏夕潛火其寺紅巾軍亂死者什七八又追至回磴關大敗之紅巾大呼之曰待明年來復仇時功在戰閒得玉珍母寄其子書云爾征南務得之不得輕還軍少糧乏我當添補楊淵海效其書跡易之曰中國兵來急爾宜早歸遂募能入紅軍營者有小卒陳惠願行玉珍得書怒國中有變又新失利遂急收軍功追之至七星關又勝之而還紅巾旣退梁王深德段功以女阿禧妻之

爲之奏授雲南平章功自是威望大著於西南梁王曲
意奉之功戀戀不肯歸國其大理夫人高氏寄樂府促
之歸其詞曰風捲殘雲九霄冉冉逐龍池無偶水雲一
片綠寂寞倚屏幃春雨紛紛促蜀錦半牀閒鴛鴦獨自
宿好語我將軍只恐樂極生悲冤鬼哭功得書乃歸既
而復往其臣楊智張希喬畱之不聽既至善闡梁人私
語梁王曰段平章復來有吞金馬嘔碧雞之心矣盍早
圖之梁王始啓疑於平章密召阿蓋主命之曰親莫若
父母寶莫若社稷功今志不滅我不已脫無彼猶有他

平章不失富貴也今付汝以孔雀膽一具乘便可毒殪
之主濟然不敢受命夜寂人定私語平章曰我父忌阿
奴願與阿奴西歸因出毒具示之平章曰我有功爾家
我趾自蹶傷爾父尙嘗爲我裹之爾何造言至此三諫
之終不聽明日邀功東寺演梵至通濟橋馬逸因令番
將格殺之阿蓋主聞變失聲哭曰昨暝燭下纔講與阿
奴雲南施宗施秀煙花殞身今日果然阿奴雖死奴不
負信黃泉也欲自盡梁王防衛者乃萬方主愁憤作詩
曰吾家住在鴈門深一片閒雲到滇海心懸明月照青

天青天不語今三載欲隨明月到蒼山悞我一生路裏

彩錦被名也吐嚕吐嚕段阿奴吐嚕可惜也施宗施秀同奴歹歹不

也好雲片波潏不見人押不蘆花顏色改押不蘆乃北方起死回生草名

肉屏獨坐細思量肉屏駝背也西山鐵立霜瀟灑鐵立松林也平

章從官員外楊淵海亦題詩粉壁飲藥而卒詩曰半紙

功名百戰身不堪今日總紅塵死生自古皆由命禍福

於今豈怨人胡蝶夢殘滇海月杜鵑啼破點蒼春哀憐

永訣雲南土錦酒休教灑淚頻梁王哀淵海之才綵意

欲為已用見詩痛悼之乃厚恤之令隨平章樾歸葬大

理

十代總管信苴段寶功之子洪武元年嗣職梁王遣矢

刺平章七攻大理不克乃講和奏陞寶為雲南左丞未

幾明玉珍復侵善闡梁王遣叔鐵木的罕借兵大理時

寶已長答書云殺虎子而還餒其虎母分狙栗而自詐

其狙公假途滅號獻璧吞虞金印玉書乃為釣魚之香

餌繡閨淑女自設掩雉之網羅况平章既亡弟兄罄絕

今止遺一嫫一奴奴再贅華黎氏嫫又可配阿蓋妃如

此事諾我必借大兵如其不可待金馬山換作點蒼山

昆明池改作西洱河時來矣書後附以詩云烽火狼煙
信不符驪山舉戲是支吾平章枉喪紅羅帳員外虛題
粉壁圖鳳別岐山祥兆隱麟遊郊藪瑞光無自從界限
鴻溝後成敗興衰不屬吾梁王見之恨寶入骨平章女
僧奴志恆不忘復仇將適建昌阿黎氏出手刺繡文旗
以與寶曰我自束髮聞母稱父冤恨非男子不能報此
旗所以識也今歸夫家收合東兵飛檄西洱汝急應兵
會善闡又作詩二章曰珊瑚勾我出香閨滿目潸然淚
溼衣冰鑑銀臺前長大金枝玉葉下芳菲烏飛兔走頻

來往桂香梅馨不暫移惆悵同胞未忍別應知含恨點
蒼低何彼穠穠花白紅歸車獨別洱江東鴻臺燕苑難
經日風刺霜刀易塞胷雲舊山高連水遠月新春疊與
秋重淚珠恰似通宵雨千里關河幾處逢後寶聞高
皇帝開基金陵遣其叔段真自會川入京奉表歸款朝
廷亦以詩報之見御製文集時有妖巫女歌曰莫道君爲山
海主山海笑諧諧園中花謝千萬朶別有明主來寶數
日疾卒子明嗣

十一代總管信苴段明洪武十四年授以宣慰壬戌春

學海類編 卷之三
正月天兵破善闡梁王自鳩黨屬悉俘明遣都使張元
亨馳書潁川侯傅友德西平侯沐英麾下曰大理乃唐
交綏之外國善闡實宋斧畫之餘邦難列營屯徒勞兵
甲請依唐宋故事寬我蒙段奉正朔佩華篆比年一小
貢三年一大貢友德怒拷辱其使明再上書曰漢武習
戰僅置益州元祖親征祇緣善闡乞冀班師友德答明
書曰我大明龍飛淮甸混一區宇陋漢唐之小智卑宋
元之淺圖天兵所至神龍助陣天地應符汝段氏接武
蒙氏運已絕於元世寬命延息以至於今我師已殲梁

王報汝世仇不降何待三月傅沐二將分兵宵緣點蒼
顛繞出下關之背先樹旗幟遲明段兵驚潰大軍策馬
亂流而濟明遂就擒并其二子仁義至金陵 太祖聖
諭曰爾父寶曾有降表朕不忍廢賜長子名歸仁授永
昌衛鎮撫次子名歸義授鴈門衛鎮撫大理悉定是夏
六月元普顏篤復叛據佛光寨 在鄧州東北 先不華叛據鄧
州甲子正月十七日潁川侯傅友德復自七星關回軍
大理平鄧州破佛光寨因定賦法築城隍設衛堡立學
校比於中州列郡焉

逸史氏曰史稱西南夷靡莫之屬以什數滇最大元封中以兵臨滇王舉國降然史未有稱也及張氏受姓後世迭君長者蒙氏鄭氏趙氏楊氏段氏高氏凡七姓惟蒙段最久故著稱焉夷裔盜名號互起滅若蜂蟻然不足錄也然至於中夏交綏抗陵疲我齊民世主甘心焉以無用戕有用是可嘸矣漢司馬氏傳西南夷誠有意哉余嬰罪投裔求蒙段之故於圖經而不得也問其籍於舊家有白古通元峰年運志其書用棘文義兼眾教稍爲刪正令其可讀其可載者

蓋盡此矣滇棘於三代爲荒服漢僅剽分其方雖胡元兵力勝之而不能守也於今列箐落而郡縣之馴鱗介而衣裳之華風沃澤同域共貫昭代恢宇前是孰竝傳稱神農地過日月之表幾近是哉夫分隔之亂昔如彼大一統之治今若此干羽不警百五十年探言其故則金匱祕文縉紳罕睹况荒徼乎余慕宋司馬氏作通鑑采獲小說若河洛行年紀廣陵妖亂志者百二十家法孔子著春秋取羣書於百二十國也因是有感遂纂蒙段事以爲滇記其諸君子祖春

滇遊記

清 江陰陳 鼎子重著

平彝縣本衛地明乙亥年始改縣設吏南渡兩重石橋
道傍有清溪洞深十餘里諸景與碧雲相類大抵洞
者皆洪水趨洩之門戶也其中景勝凡洞俱有皆大
同小異俱碧乳融成石罅水氣所結如兩廣之神仙
閩中之玉華廬州之崔仙湖廣之梵陽景與碧雲半
相類矣出清溪後戶卽紫泉洞亦幽深可愛遊者不
倦過揚威哨皆如中原坦道兩山繁林木矣又多鸚

學海類編 卷之三
遊覽
鷓鴣諸禽鳴聲上下頗傾客耳

交水卽新霑益州舊治去交水西北百十里往烏撒必由之道交水兩水相交平疇萬頃民物豐阜恍如江南風景矣去予畱寓之曲靖府方三十里耳

馬隆州有義象豕明天啓閒水西安氏叛率眾犯州滇省戒嚴撫軍調陶土司禦之陶有一象日將暮伏山澗中鼻吸泥水數斛突出咆哮跳躍鼻噴泥水直抵賊壘寇皆驚駭復捲一賊擲空墜死陶之牙將乘機逐北遂獲大捷及曉收師象中毒弩而斃土人德之

葬于南山春秋祭掃至今不輟

木密關卽木密所也有小關索嶺上有武侯及索祠祠前銅馬一乃唐時物也古柏參天俱大數圍道傍有碑云武侯平蠻會盟於此按史亮盟南人於木密卽此也

易隆驛屬尋甸州東坡有詩卽木密所也今已傾圮去城十里許有溫泉可澡

大鼎山有海潮寺寺頗清幽多竹木面海子闊數十里周百餘里隔岸卽嵩明州去寺半里道傍有毒泉碣

學海類編 卷之三 遊覽
云此係毒水飲者傷生楊林屬嵩明州前朝所也今
省入州出東關五十五里卽楊升庵慎題詩處也
板橋驛出西關三十五里歷鷓鴣哨度石梁而至歸化
寺去滇城止五里矣登金馬山俯瞰城中煙火萬家
樓閣參差雙目頓爽也自江甯至滇城共七十三驛
計程五千二百零由洞庭水道則過之而幾有萬里
矣

會城內有三山五華其一也上有武侯祠明末永歷帥
孫可望建宮殿登極於上今則成瓦礫矣吳三桂邸
在城西北隅今惟餘池沼園亭之址在焉

螺峰在城東北隅倚山建元通寺頗多亭榭名人題句
甚多俱刻巖石松楸頗盛四時綠陰交覆白雲瀰漫
差足遊覽夏桂洲有五言律一首鐫崖石上其辭曰
古寺翠崖陰危亭絕頂臨鶴巢松有夢雲出岫無心
仄徑攀蘿上叢臺刻竹吟南蠻秋日暝哀響合猿音
正德十三年秋七月五日廣信夏言題但未考桂洲
何事而至滇也

城南七十里卽太華山高峻凌虛城西卽碧鷄山相傳

漢時有鳳儀此所以王褒持節來祀也城北蛇山直出雲表如列屏翰

金馬碧鷄坊在南關外乃百貨匯聚人烟輳集之所也富庶有江浙風

東郭有金牛寺寺外八角亭中有銅牛一重數萬斤以鎮水怪蓋此地緣溪每春夏霪雨東北萬山之水奔流如駛往往衡圯民居故範牛以鎮明末孫賊僭號取牛鑄錢國朝水發屢壞廬舍今已復鑄水患減矣

銅瓦寺在會城東十餘里金馬山西北麓範銅爲瓦覆寺三楹春月遊人畢集

昆明池方數百里跨雲南安甯晉甯三州郡水如倒流故曰滇水無洩處或曰由西南流入金沙江以趨蜀未知是否

安甯州有溫泉甲於諸泉稱三絕第一無硫氣二則身有垢不假澣濯入水俱浮三有疥癬者一澡卽痊

大理府爲天竺之妙香國初屬羅刹相傳觀音大士從中印土來登點蒼山巔跏趺信宿今盤陀石尙在化

其地結廬勒券刻洱海石壁字跡宛然

蒼山峰頂有黑白二龍池雲霧晦暝羣龍千百出沒黑池尤猛烈樵者不敢近木葉飛墜霹靂隨之

白崖在大理東南烟火萬家有高娘寺與迷都隔百里迷都亦大村落百貨俱集地暖同交趾沃壤數萬頃點蒼山一名靈鷲梵語耆闍崛蒙氏封爲中岳漢書曰邪龍雲南其山如扶風太乙上有馮河周迴萬步五月積雪皓然卽此山也有十九峰夕陽峰居中其高直上五十里登其巔復有大山高五十里度嶺西行

達永昌界矣山色蒼翠欲滴奇花異卉徧於巖谷四時不謝早起開爽日出後卽雲霧覆之至七八月雲霧收淨惟一白縷橫截山腰日夕皆然所謂玉帶鎖蒼山也其下多文石三塔寺後產者乃佳餘皆白石而已地暖無冰霜溪澗積雪厚數丈盛夏兒童盪盛賣之和以糖蜜可療飢但多食則生癭嵐瘴所結也大理一名羊苴咩城狄青討儂智高史稱智高遺金龍衣而遁不知所終殊不知其終於大理也今其宅遺冢尙存城內有兩司馬祠一祀司馬遷一祀司馬相

如漢元封閒遷奉使西征南略邛笮昆明相如持節
開越巂故皆立祠祀之隋南蠻叛史萬歲破之追近
大和見諸葛武侯紀功碑銘其背曰萬歲之後勝吾
者過之萬歲踣其碑碑跌誌曰史萬歲不得仆吾碑
遂爲復立今在高娘寺史公亦有遺像明萬歷閒鄒
應龍撫滇平鐵索箐赤石崖羣盜今有戴德祠此葉
榆四遺愛也

感通寺在郡南十里點蒼之麓又名蕩山寺峰巒環遶
林壑幽深楊升庵寓寺小閣題曰寫韻樓四壁皆升
庵墨妙升庵往來大理永昌閒近四十年訪於舊家
得白古通元峰年運志其書棘文升庵熟諳其語譯
爲滇載記南詔始末方得詳備登寫韻樓雞足雪山
橫亘煙雲之表明末滇詩人唐大來雉染號擔當和
尙亦寓此樓壽九十餘樓前白茶花高數十丈大數
十圍花如玉蘭心殷紅滇南只此一樹埋條分種皆
不活也

崇聖寺又名三塔寺在郡北五里三塔矗峙隔洱海百
餘里輒望見中塔正方磚石甃成高四十八丈十六

學海類編 卷之六 遊覽
級絕頂四角範四金鵝高二丈塔下遊人以巨石投地金鵝昂首長鳴音響清越黔國公楷書山海大觀四字文石鑿成一字縱橫四丈四石列塔前如屏銅鐘二各重十萬斤南詔建極十三年造乃唐咸通年也大雄殿巨麗精巧覆以琉璃瓦墁地竝徑丈點蒼石甬道傍紫荆樹亦高數丈唐朝老梅狀若古松亭亭直上枝幹如檜柏大士像乃天雨銅汁所鑄高二十四尺滇西雨銅雨鐵乃常事不足爲怪然其理不可得而究也

黃花老人石刻草書在崇聖寺中字大如盃筆法飛舞相傳以檳榔殼蘸墨書者老人爲宋元閒人自江右來住久仙去四絕句甚佳其辭曰王母祠東古佛堂相傳棟宇自隋唐年深寺廢無人住滿谷西風栗葉黃手拄一條青竹杖興來日掛百錢遊夕陽欲下山尤好深谷無人不可畱帝遣名山護此邦千家落落嶺西窗山人乞與山前地鶴托先開二十雙掛鏡臺西掛玉龍半山飛雪舞天風寒雲欲上三千尺人道高歡避暑宮

學海類編
宏聖寺在郡西二里舊名王舍寺浮屠三十丈十六級
阿育王建寺前有楊升庵摹刻禹碑蒼山向有五百
寺俱阿育王建今尚存六十餘處城內大慈大悲文
殊普賢藥師興福而普賢最大爲祝聖所玉局峰下
以唐御史杜光庭爲伽藍光庭自號青城居士灌縣
人教授大理始開文教龍泉峰下有祭天臺相傳諸
葛武侯征南在蒼洱駐兵數月見玉局峰下鳳凰一
雙飛鳴而過公攬車徧歷榛莽得峭壁石龕三皇五
帝像乃建閣奉像其中而祀之又於石上鑿八卦合

尚存焉

無爲寺在蘭峰半巉巖峭壁行茂林數里兩山豁然中
開從絕澗左折入寺有石樓寬三十丈掘衣登之洱
海雪山近在几席有香朶五株大百圍高八九十丈
太古時物也昔有二十餘樹喪亂時爲樵爨伐盡此
僅存者

芒湧溪在郡北二十五里昔有三十八庵巖壑幽秀天
風海濤時震林木蒼山中巖號雪山有盤石徑丈爲
釋迦苦行地草石皆作旃檀香亦名香石巖傍有鳳

學海類編
眼洞有天生木橋其木半月一換四季長新人跡罕到惟樵徑耳與畢鉢羅窟相近皆點蒼古跡也然天生木橋神力半月一換永昌鶴麗皆有之不止大理也靈鷲列刹相望蓋在天竺幅員之內爲阿育王故封曾建八萬四千塔大理塔基數百皆其舊址唐乾德二年詔沙門三百人入天竺求舍利及梵書至開寶九年始歸其記錄行程曰巍峰曰雞足山曰優波掬多石室曰王舍城曰鷲峰曰阿難半身舍利塔曰畢鉢羅窟以今考之皆大理古跡也蓋當日由西番

行入天竺而轉東行以達大理者緣南詔爲蒙氏地而黔蜀之道不通也白古通載釋迦在洱海證如來位而藏中載釋迦於靈鷲山說法華經其說相合又釋迦死時迦葉尊者在耆闍崛山後入雞足雞足與靈鷲相望而畢鉢羅崛舍利塔見存與通紀西陽雜俎吳船錄舊唐書俱同一轍然則世之所謂佛國者卽在滇南矣

大理西門外教場每年三月十四十五十六三日爲大街子百貨俱集結茆如闐闐文武官吏共出彈壓以

防蒼山後生猥搶劫唐宋元明相沿不廢如小街子
逢二五八日聚於各市午過則散矣大理有風花雪
月四景上關花下關風蒼山雪洱海月今花斬伐無
種風則處處有之下關稍甚耳自九月起至次年五
月無日不排山倒嶽破房揭瓦聲如雷吼惟黎明少
息辰刻復起室內然燈入窗洞開燈影不搖也過下
關橋必下蓋整冠否則飛颺而去矣下關南望萬山
壁立一水中通其曲折處卽風穴故雖晴和之日此
處仍然大風不息語云雨師好黔風伯好滇豈風雨
果有所好哉蓋滇西瘴氣特甚有風則散亦上天愛
人之至故生風穴於其閒也

洱海源出下關北流合金沙江江屬麗江府所謂恆河
也海產大頭魚食之皮脫土人忌蒼山絕頂有高
河菜七八月生紅莖碧葉味辛如芥

櫻桃樹極多大數圍高數十丈白多於紅味酸澀連翹
花徧於籬落黃色可觀杜鵑有五色茶花亦有黃紫
紅白四種其大如盃夜合樹高廣數十畝枝幹扶疏
曲折開花如小山覆錦被絕非江浙馬纓之比葶麻

數十年不凋其本可作梁棟土人以之構堂屋番瓜
如斛大重至數百觔者茄大如斗瓠匏可盛粟二十
斛片之可爲舟航梨至有七觔重者

雲南縣古名洱海縣南二十五里爲水目山水目梵刹
容眾千餘

太和縣城傍蒼山學宮衙舍祠廟皆東向十九峰澗水
進城潺湲不絕故民殷富土肥饒穀穗長至二百八
十粒戎菽年前卽采供蔬饌土人謂之大莞豆藥有
一百七十七種性良於他產惟附子自蜀中來土橄

欖生籬落閒如龍眼色紅黃味同閩中青橄欖黃柑
產賓川者大如盃胡桃皮薄如紙山桃皮厚可榨油
榛松皆不下遼東但味淡少遜耳花之屬四時不絕
雖大雪五色爛漫略不萎謝草至五月始生以地不
熱之故然花獨不畏寒耶理不可解也刺桐花開於
七月極紅旁映他樹山石皆赤惟蘭不香梗葉之大
過閩蘭二十倍鉤藤亦出蒼山以之釀酒名咂魯麻
定西嶺在白崖西北高數千仞至巔則坦如有水可種
桑麻百萬頃也四十里至趙州自湖南辰沅以西皆

自下而上至鎮遠趨貴陽俱上大山斗峻險絕之坡
指不勝屈皆上峻而下坦也至定西而盡其地高中
州千有餘里去天尺五黑夜星光照耀如晝天如覆
釜伸手可捫星辰身雖履地自覺憑虛至永昌騰越
更入霄漢矣

洱海朝東風暮西風四季不爽故舟航來去皆張帆而
行不假篙櫓至八月望夜海中出珊瑚樹高數丈漁
者盡見冬日大風海水倒卓起火光如山

金沙江兩岸皆白沙佛書所謂恆河沙卽此也上流卽

狗頭國今年大水漂一狗頭人至岸上下衣服同中
國口耳眉目皆狗也逾日得土氣狗人復生問其言
答之如狗吠與之飲食大嚼也土官解來大理軍門
府因得寓日後軍門命土官解還原處解人行一百
二十餘日始抵其國國中無城郭有宮室國王朱冠
阜履跨白馬佩刀官吏皆如之服食起居中國同也
婚嫁則非金沙江水經注所謂西洱河也洱水合漾
水瀛水西南行三日八十里至瀾滄江卽黑水也自
黑水東北行九千里達於北京東行七千里遶於河

甯大理蓋中國之極西而迤南矣

沅江武定之間有魯葵山方千里民皆蓄髮劫掠流毒
官兵不能制地險絕鴻荒以來未見天日過此則銀
場在焉富甲於江浙

文殊寺方丈面東雞足當前如列翠屏雞足之東玉峰
出天半此麗江小雪山也登小雪山卽望見大雪山
矣小雪山亦出雪蛆大者如兔味如乳酥多食口鼻
出血

雞足山在賓川州汎洱海四十里乘風而渡兩日到山

三峰偃伏如雞距頂有石門佛大弟子摩訶迦葉乘
釋迦衣鉢入定於此候慈氏佛下生乃入涅槃逢歲
朔四方緇素進香自漢迄今不絕大刹七十二所蘭
若三百六十小庵無算傳衣羅漢迦葉寂光放光五
大寺最著每寺千眾或數百眾不等皆刀耕火種爲
食僧多卷毛鉤鼻深目穿耳卽曩在五臺京師及江
浙閩粵所見乞食羅漢也頗知漢語迦葉殿在雞足
之半無三十年不火

賓川州瘴氣甚濃四五月閒雞足道絕人行更有變鬼

者婦女居多或變貓變羊變雞鴨變牛糞變象馬遇
單客則殺而奪其貨村落中或有此種人左右鄰必
鳴官擒治否則連坐其人而黃眼赤神情恍惚容易
識認
金沙江有二在緬甸者流而南在麗江者流而北南趨
南極北則遶西極合黃河而入中國皆發源大理之
洱海卽葉榆澤也黑水源出吐番嵯和哥界而流爲
瀾滄江以西洱爲黑水者非也故足跡不到盡信書
不如無書也

騰越鐵少土人以毛竹截斷實米其中熾火煨之竹焦
而飯已熟甚香美亦有巢居者語言不通地出琥珀
碧玉珍寶彝婦紉葉爲衣飄飄欲仙葉似野栗甚大
而柔故耐縫紉且可卻雨也

麗江府土府也有同知掌府印知府則木氏世襲見同
知甚恭稱公祖自呼曰治晚生景東蒙化永甯三郡
皆然此三郡不若麗江繁庶余曾至三郡山川草木
皆不足紀也麗江過雪山三四日程皆喇嘛居止從
此達中印度僧俗俱戴紅帽烏斯藏戴黃帽僧稱大

寶法王紅帽者稱二寶法王皆茹蔬有幻術能變化
大寶法王臨死現七十二相故土人皆驚怖以爲活
佛也打箭爐近天全六番余昔遊蜀與天全副宣慰
楊自唐相識因入其地豐庶甲諸番百貨皆有烏斯
藏以打箭爐爲外障也

臨安府漢彝雜處所轄之石屏阿迷二州時有彝患近
日三韓徐印祖知石屏以威德制之患少息郡出楸
子有銅鐵二種每囊百八顆銅色者佳黑鹽井亦出
不及郡中通海縣出紬與布斜紋線織極勤著

澂江府最荒涼然民淳易治糧不逋盜賊少訟獄簡易
爲循卓吏惟路南州稍悍耳然苗獠之患亦不免也
廣西府近安南有莫冶峰高萬仞終歲雲霧不開在師
宗彌勒之境惟三月三日起至四月三日止一月皎
潔遊人登其巔望見安南宮室山中多金銀礦故民
物富雖十廣南府不及也

楚雄姚安開化三郡雖相閒甚遙而風土則相近然肥
瘠各異故貧富不類山川亦有奇異可紀者洞壑亦
有絕勝可遊者山若凌華欺岱眇岳天鐘黃雲紫絲

皆秀色可餐川若丹池墨海雲溪波塘荷澤菱漢皆可濯纓濯足而五色三州之諸生皆恂恂儒雅敬慕中國余曾徧遊三郡邑車馬之資飲食之供皆各諸生傳奉諸生之家卽余遊客之郵舍也別時各有遺贈土儀之盛餽贐之豐多至百金者甚矣文教之重也雖蠻貊之鄉誦詩讀書之人皆知敬其類而文物之邦其能若是也耶

蒙化府產雞縱菜赤白二種赤色味絕佳其油甘香可調五味椒油色碧如泉其香如蘭入蔬中食則沁肺

腑溲溺皆馥

武定府山川亦可流覽但民貧土瘠健於訟悍於鬪有燕趙風所屬祿勸州有洪冶山巔有火池陰雨則熾然

永昌府瘴癘最濃產寶石掘者往往瘴死井中出圍碁子光潤如玉琢勝會城出者鐵索橋數處架萬仞山巔險過盤江百倍然窄易渡耳

滇西多蜜餞物蜜甚多彝人撲得大蜂以長線繫其腰識以色紙迎風放之乃集眾荷畚鍤隨行度越山嶺

蜂入土竅中從而掘之其穴之中大如城郭輒得蜜數百斛故檳榔香附橘橙佛手柑木瓜香圓梅李川芎瓜茄多以蜜漬供客復以酒醉羣蜂餉親友如溫台之海味也蚱蜢油炙如鰕或曬乾下酒猥猥男婦小兒見草中螽斯之屬卽歡笑撲取以火燎其毛嚼吞之

滇中苗猥棘爨麼些之屬擔負貨物項戴半木枷徒行亦不暫脫相傳武侯定南蠻設此號令羣彝使其不敢與漢人爲伍以別貴賤殊不知非也彼戴木枷者殆可負重以便工作耳

命河東地以明上世



黔志

明 天台王士性恆叔著

貴州古羅施鬼國自蜀漢彝酋有火濟者從諸葛武侯
征孟獲有功封羅甸國王歷唐宋皆不失爵土洪武
初元宣慰使霽翠與其同知宋欽歸附高皇帝仍官
之爲貴川宣慰使司隸四川其思州宣慰使爲田仁
智思南宣慰使爲田茂安暨鎮等府隸湖廣普安鎮
甯等州隸雲南霽翠死妻奢香代立宋欽死妻劉氏
代立劉氏多智術時馬曄以都督鎮守其地欲盡滅

諸羅曾代以流官乃以事裸撻奢香欲激怒諸羅彝
爲兵端諸彝果怒欲反劉氏止之爲走愬京師上令
招奢香至問曰汝誠苦馬都督我爲汝除之何以報
我奢香曰世戢羅彝不敢爲亂上曰此汝常職何云
報也奢香曰貴州東北有閒道可通四川願刊山通
道給驛使往來上許之謂高后曰吾知馬都督無他
腸然何惜一人以安一方乃召馬斬之遣奢香歸諸
彝大感爲除赤水烏撒道立龍場九驛達蜀今安氏
卽壽翠後

貴州設山上中高而外低如關索乃貴鎮山四水傾流
內無停蓄北二水一出涪江一出瀘江東一水出沅
江南二水一出左江一出右江有水源而無水口故
是行龍之地非結作之場也

貴州多洞壑水皆穿山而過則山之空洞可知如清平
十里雲溪洞水從平越會百里來又從地道潛復流
雲洞盡處水聲湯湯如溪流洞右偏土人又累石爲
堤引支水出洞南灌田甚廣新添母珠洞發衛六七
里陟降高崖卽見流水入山椒穿洞過出水處亦一

洞乃名母珠嘗有樵者至洞中數石子隨一大石似
子逐母夜有珠光故名也最奇者普安碧雲洞爲一
州之壑州之水無涓滴不趨洞中者乃洞底有地道
隔山而出洞中有仙人曰高下可數十畦石塍迴曲
界限儼如人閒豈神仙所嘗種玉禾者耶其無水而
曠如者偏橋飛雲洞由月潭寺左拾級而登仰視層
巖如蜂房燕窠級窮上小平臺石欄圍繞臺後崑嵌
入巉絕巖上如居人重簷覆出而石乳懸竇怪詭萬
狀洞前立二石突兀更奇他如鎮遠凌圓洞清平天

然洞安莊雙明洞與平霸喜客泉安莊白水或道左
而未過或輿過之而未窮其勝不能一一紀之

出沅州而西見州卽貴竹地顧清浪鎮遠偏橋諸衛舊
轄湖省故犬牙制之其地止借一線之路入滇兩岸
皆苗晃州至平夷十八站每站雖云五六十里實百
里而遙士夫商旅縱有急止可一日一站破站則無
宿地矣其站皆以軍夫辰州以西轎無大小官無貴
賤輿者皆以八人其地步步行山中又多蛇霧雨十
二時天地闇忽閒三五日中一晴霽耳然方晴倏雨

又不可期故土人每出必披氈衫背笏笠手執竹枝竹以驅蛇笠以備雨也諺云天無三日晴地無三里平其開設初只有衛所後雖漸漸改流置立郡邑皆建於衛所之中衛所爲主郡邑爲客縉紳拜表祝聖皆在衛所衛所治軍郡邑治民軍卽尺籍來役戍者也故衛所所治皆中國人民卽苗也土無他民止苗彝然非一種亦各異俗曰宋家曰蔡家曰仲家曰龍家曰曾行龍家曰羅羅曰打牙犵猪曰紅犵猪曰花犵猪曰東苗曰西苗曰紫薑苗總之槃瓠子孫椎髻

短衣不冠不履刀耕火種樵獵爲生殺鬪爲業郡邑中但征賦稅不訟鬪爭所治之民卽此而已矣本朝勾取軍伍總屬虛文不問新舊徒爲民累惟貴竹衛所之軍與四川雲南皆役之爲驛站與夫糧不虛糜而歲省驛傳動以萬計反得其用

彝人法嚴遇爲盜者縋其手足於高桅之上亂箭射而殺之彝俗射極巧未射其心簪不能頃刻死也彝性不畏亟死惟畏緩死故不敢犯盜貴州南路行於綠林之輩防禦最難惟西路行者奢香八驛夫馬廚傳

皆其自備巡邏干擷皆其自轄雖夜行不慮盜也彝俗固亦有美處

貴州土產則水銀辰砂雄黃人工所成則緝皮爲器飾以丹朱大者箱櫃小者筐匣足令蘇杭卻步雄黃一顆重十餘兩者佩之宜男土官中有爲盤爲屏以鎮宅舍者砂生有底如白玉臺名砂牀箭頭爲上牆壁次之雖曰辰砂實生貴竹

關索嶺貴州極高峻之山上設重關掛索以引行人故名關索俗人訛以爲神名祀之旁有查城驛名頂站

深山窳箐盜賊之輩實繁有徒縉紳商賈過者往往於此失事崙以一衛尉統邏卒護之

安宣慰唐時人家渠謂歷代以來皆止羈縻卽拒命難以中國臣子叛逆共論故時作不靖弗安禮法其先宣慰不逞陽明居龍場時向貽書責之其後安國亨格詔旨朝廷遣使就訊之令其囚服對簿赦弗征而國亨後亦竟桀驁如故院司弗能堪今安疆臣襲又復悖戾不遵朝廷三尺如貴竹長官司改縣已多年而疆臣猶欲取回爲土司天下豈有復改流爲土者

學海類編 卷之五 遊覽
故江長信疏欲勦之未知廷議究竟何似

養龍坑長官司有坑在兩山之閒停蓄淵深似有蛟龍
在其下當春時騰駒游牝彝人插柳於坑畔取牝馬
繫之已而雲霧晦暝類有物蜿蜒與馬接者其生必
龍駒

鎮遠滇貨所出水陸之會滇產如銅錫斤止值錢三十
文外省乃二三倍其值者由滇雲至鎮遠共二十餘
站皆肩挑與馬羸之負也鎮遠則從舟下沅江其至
武陵又二十站中閒沅州以上辰州以下與陸路相

出入惟自沅至辰陸止二站水乃經 盈口竹站黔
陽洪江安江同灣江口共七站故士大夫舟行者多
自辰溪起若商賈貨重又不能捨舟而溪灘亂石險
阻常畏觸壞起鎮遠至武陵下水半月上水非一月
不至

思石之閒水則烏江發源播之南境下合涪江陸與水
相出入此川貴商賈貿易之咽喉也卽古牂牁夜郎
地思南府西有古牂牁都城漢末所築者古牂牁郡
領扶歡夜郎等縣或云夜郎在珍州珍屬播與今思

學海類編
明接界

播州東通思南西接瀘北走綦江南距貴竹萬山一水
抱遶縈迴天生巢穴七日而達內地然其地坐貴竹
而官繫川中故楊會應龍伺川中上司則恭見貴竹
則倨川議賞貴議勦非一日矣及王中丞繼光倉卒
舉事挫辱官兵於是天討難留而又加以七姓五司
素被傷殘赴闕請勦然彼會畏懼天兵之至情願囚
首抹腰聽勘處分蓋彼會因子死巴獄而又防七姓
之侵陵故死不敢入重慶而不憚囚服了事者其情

也何敢輒萌他變而此中以會拒王師故心疑之而
不敢前余弟圭叔守重慶覘知顛末單車入往諭之
彼遂出松坎來迎松坎者此入三日而彼出五日程
也其後乃於安穩塔蓋衙門聽司道贊畫入勘贖緩
而罷是行也實賢於數萬師矣


而野山石自海濱...

如東後之...

如室...

不知前...

山...



黔遊記

清江陰陳鼎子重著

鎮遠府河勢紆曲水由黃平州萬山中來峰巒聳拔上
出重霄無城郭依山爲衛隔河有衛城今省衛入縣
實以守兵誠控御良策也水路上阻諸葛洞之塞止
可到此故舟車駟輳貨物聚集下十五里卽兩路口
乃通黎平之道也黎郡北連楚壤南接西粵中有九
股黑苗聚落於古州八萬方二千餘里泉甘土肥出
五金礦民物豐阜俗以十一月爲歲首其地家蓄肥

牯織五色布每元旦殺牛焚布以祀天自古不服中國今爲仲家誘出焚掠邊境黎平受害特甚出鎮遠西門卽油榨關雖不甚險實鑿開一綫之道也過關平路十里至相見坡三重迭起高皆千仞計程有三十里登首坡則尾見立中坡前後顧則首尾見陟尾坡則首見行旅者此以手招彼以口答應嚮若咫尺而不知三十里之遙也

華巖洞中有大士像儼如雕琢洞深數十里諸景畢具大有洞天之勝

望城坡登其巔可望偏橋衛城故名南里許卽諸葛洞相傳武侯征蠻鑿開運糧者然非洞也乃兩山陡立中夾一溪後爲大水所衝兩崖巨石梗塞中流舟楫難行明黔撫郭子章開通直達黃平旋復塞 國朝制軍卞三元復濬通舟民稱便焉今復巨石壅斷卽如葉漁舸不能行矣諺曰若要此洞開除非諸葛來豈其然歟傍有半蓮洞狀如半朶蓮花妙高臺在其北今廢崖半有武侯蕭公晏公楊四將軍石刻像郭卞二公碑記在焉

學海類編 卷之三
偏橋本備近省入施秉縣移治治焉下七八里有白雲
洞深十里許中有蛟龍獅象石牀石凳等景頗可遊
觀

飛雲巖玲瓏奇絕巖下有溪石梁亘之度橋歷級而登
仰窺雲際覆如華蓋乃飛雲巖也蛟龍獅象碧乳滴
成上垂下伏鱗甲宛然巖外三峰壁立高與檻齊有
亭翼然臨於峰上飛泉潺湲冬夏不絕或曰巖性好
潔昔有穢者信宿于此則瀑水突至瀰漫澣濯再穢
復澣巖下有洞深不可測或云達鎮遠後山西卽月

池上有月潭寺松杉遶屋蒼翠參天內有王陽明先
生碑記言天下之山萃于雲貴連亘萬里極天無際
往來之人日攀援於重巖絕壑之間雖素有泉石之
癖者一陟雲貴之途皆踣困煩厭非復夙好至此卽
傭儔俗侶曾不知有山水之觀者亦徘徊顧盼相與
延戀而不忍去可謂善寫此巖者矣

興隆衛卽古牂牁郡今省入黃平州移州治于內焉歷
三十里渡重安江江之上流接新添衛諸山之水合
平越葛鏡橋麻哈江下入古州入萬經生苗地二千

餘里達黔陽合大溪趨洞庭以入大江者也

大風洞卽道書所謂時蒼洞天也又名雲溪洞後門在楊老西與平越接壤蓋深二三十里矣中有蒼龍白虎石鐘可扣石鼓可搥入里許則涼風颼颼竦人肌骨雖六月須披裘以遊至半有天穴如斗斜逗日光照見一切洞外有亭殊可憑眺

竹王祠在楊老驛去清平縣三十里三月閒香火極盛相傳漢時夜郎女澣於遯水忽有巨竹三節上流浮下中有兒啼聲剖得一男育之及長有材武自立爲

夜郎侯以竹爲姓能以威德撫諸蠻蠻皆歸之武帝平西南彝侯迎降封夜郎王後乃殺之蓋猜其欲叛也羣蠻思之不置請立後牂牁太守吳君以聞乃封其三子皆爲侯俱能以德撫眾旣卒羣蠻立祠祀之黃絲驛亦有其廟香火亦盛

葛鏡橋跨麻哈江而造兩山壁立千仞相束一江水黑如膠有風不波霧罩山昏鮮見天日昔皆懸絙以渡沈溺者眾明嘉靖閒里人葛鏡建橋以濟旋圯再建復傾乃齋戒沐浴率妻子刑牲以誓曰橋之不成有

如此江遂破產經營卽成至今賴之
平越郡城內有張邈邊修道故跡邈邊名三丰閩人洪
武開以軍籍戍郡蓬頭赤足丐於市人呼爲邈邊翁
於高真觀后結茅爲亭閉戶靜坐與指揮張某善嘗
與飲博指城南月山寺地曰葬此可封侯張從之後
果以戰功封隆平今亭前一池冬夏不涸旁有一桂
亦其手植府南五里卽武勝關隔溪絕壁有三丰遺
照戴華陽巾側身攜杖西行儼然圖畫旁有明撫軍
郭青螺書神畱宇宙四大字下有夜滴金橋雖晴夜
亦雨灑數點又有晚霞斜照不計晴雨俱有斜暉
憑虛洞去新添衛十里衛省入貴定縣矣洞深十里中
有瀑泉聲如雷吼俗呼母珠洞下五里甕城橋長百
餘步其水入蜀

古福洞深四十餘里中有大溪水聲如雷昔有持炬入
遊者見蒼龍偃息溪中鼾聲如雷吼懼而返余入遊
時當冬月水涸溪水僅尺遂褰裳以渡其中景物真
天造地設浮圖高十六級每級三丈餘皆玲瓏有階
可登每級俱有瞿曇像香爐炬臺皆天生成者石鐘

石鼓擊之聲聞洞外萬山俱響百谷皆鳴數十里都
震動苗人盡驚咤奔視次日下午從後門出迂道百
五十里而抵龍里餘從者尙伺于洞口菴中馳騎召
之乃來

龍洞本衛也後改爲縣南關外有畱人洞幽靜可愛客
至每畱戀不忍去然淺迫止可容數人耳

觀音洞深五百餘里從洞中行乘七日炬可達都勻境
從來少人窮其穴者明有直指方君曾盡遊焉余有
好奇之癖因具十日炬裹一旬糧而入初數里甚宏

敞愈入愈窄止可容一身若是者十餘里乃後愈窄
側身以行者三里三里之外則可馳五馬駕高軒矣
中有樓臺殿閣人物花鳥之景皆碧乳融成者也至
七十里舉炬四照則無涯矣因循石壁以行壁之畔
有泉一泓甘香如醴泉之畔有銅釜一可容十升壁
上有題句云隆慶三年錢塘方紹宗於此煮泉筆墨
淋漓字畫遒勁大可愛是蓋直指公所書也余亦續
題云康熙十年江陰人陳鼎亦於此煮泉行十餘里
則不復曠蕩矣竟行九日半始得達後口乃都勻府

學海類編 卷之六 遊覽
之東盡境空麻地方再五里卽苗爇中矣
龍洞去貴州省城五里淺窄不可遊省城之水皆流入
陸廣河下烏江者也自省以西山川迥異皆箇箇自
生不相聯絡無復瞻顧依迴之狀或如鐘鏞特豎或
如鎗槩矗天或如烽墩孤立俱平地突起遶道而生
遠山則連亘插天童然不毛田皆石底上惟尺土五
日不雨則苗枯槁世所謂雨帥好黔言黔中無五日
不雨也雨帥豈真有所好哉良由彼蒼愛人之至惟
恐禾荒民飢故無五日不雨耳

棲霞山在省城東二里孤峰特立峭壁凌虛由北坡曲
折而上至巔則平坦如枰局四高中洼遶廊西行入
大士洞登捨身巖穿紫竹徑西升傑閣遙瞻會城烟
火萬家歷歷在目

涵碧潭在會城南合定廣威平之水而入南明河越霽
虹橋而東行將折而西北至此淵而不流卽涵碧潭
也上有釣鼇磯跨以石梁明郭撫軍築以障水者磯
上有甲秀樓左武侯祠右維摩閣俱近碧潭頗可遊
覽南明河水鳴會城必有回祿之厄

相寶山在會城東北里餘上有屏山寺寺西一巖周擁
大樹踞巖西望可窮千里目也

朝陽洞在會城銅鼓山傍文筆峰側幽深四十餘里頗
可遊覽乘三日炬則盡其勝矣

龍井在會城內西北隅冬夏不竭大旱三年亦不涸泉
甘而碧合城皆賴之

紫池卽紫泉發源於鬱江乃遯水與牂牁江之源也流
入洞庭匯于大江而入海

扁趵泉在會城西十餘里黔靈西南山中廣不盈尺一
晝夜百盈百縮置表以測莫之或爽俗呼百刻泉又
名百盈泉又名聖泉味甘而冽久服可愈瘋黑髮駐
顏卻老

黔靈寺乃撫軍曹升吉所創初荒山也寺在山巔盤曲
而上者三里有泉一泓可供百眾大旱不涸寺后一
池冬夏不竭周多竹木頗幽勝也

白雲山在會城西南定番州境乃明建文帝晦跡處有
流米洞米自洞中流出以供帝帝去米絕跪接泉相
傳龍神獻帝在峰半峭壁閒須跪而汲者

谷水龍在會城西南五十里有大寺容眾數百去寺十里
里有泉從石壁流出甘美清碧居人咸飲之遇有兵
變則色赤如血

黔省苗蠻種類甚多有花苗東苗西苗牯羊苗白苗青
苗谷蘭苗紫姜苗平伐苗九股黑苗天苗紅苗生苗
羅漢苗陽洞苗黑羅羅白羅羅八番苗打牙犵狓剪
頭犵狓木犵狓仲家苗土人苗羊黃苗蠻人苗楊保苗
狗耳龍家苗馬鐙龍家苗棘人洞人宋家蔡家共三
十餘種風俗各異惟宋家蔡家馬鐙龍家乃戰國時

楚伐宋蔡龍三國俘其民放之南徼流而爲苗者知
中原禮義衣服祭祀婚嫁喪葬揖讓進退一稟於周
而花苗東苗西苗牯羊苗四種淳朴外其餘皆不可
以禮法教者惟土司官威刑始得以制之諸苗中仲
家最惡而險通漢語知漢書到處皆有其種蓋其商
賈於諸苗之中如徽人紹人之於中原也然秉性匪
良專造藥弩種蠱毒搆結生苗劫掠百姓爲害最烈
捕則竄入深箐無從追緝生苗者無頭目不服土官
黔東雄而強者卽爲長或聚至數百人卽僭號稱帝

儼然冕旒黃衣而端拱于荒山之巔以受數百人之朝賀而呼萬歲官兵至則遁而之他山逢人卽殺見物卽刦去司官或統人四面截殺則盡之矣他日又有羣聚者仍然焚掠而仲家多通諸苗之言多識棘文之人復誘而入內地刦殺商賈爲害不可勝言田綸霞先生撫黔設鵬勦法始不敢出四境獲安苗俗每歲孟春月男女各麗服相率跳月男吹蘆笙於前以爲導女振鐸於後以爲應連袂把臂盤旋宛轉各有行列終日不亂暮則挈所私歸謔浪笑歌比曉乃

散聘貲視女妍媸而定多寡必生子然後歸夫家惟紅苗爲甚每至立春日擇男女之麗者扮各故事以迎于市爲樂男子之麗者卽古之潘安宋朝有不及焉女子之麗者漢之飛燕唐之太真亦無能出其上矣此種女子欲購之者牛馬當以千計而始首肯男子皆不樂爲龍陽君有犯之者輒自殺

刺梨野生夏花秋實榦與果多芒刺味甘酸食之消悶煎汁爲膏色同楂梨四封皆產移之他境則不生每冬月苗女子採入市貨人得江浙楚豫客買之苗女

喜曰利市得佳客交易也本省人爲之買則倍其價江南人或物色之則舉筐以贈曰愛莫離愛莫離者華言與你有宿緣也或有調戲之者則大怒曰落勿渾落勿渾者華言沒廉恥也所謂物色之者非有他意也乃婉容愉色以問其出處故喜悅也山峒中諸苗男女見吾輩鮮衣奴馬僕從呼擁而至舉家皆出而膜拜有不知者輒大聲呼之而出曰睨漢郎睨者視也漢郎者漢官也或下馬過其家乞水火必舉家男女跪而奉之其愛慕中國如此惜乎無有以化之者苟有化之者皆相率而入禮義之域矣

脍蛇出土司中長尺餘伏草莽間見人輒躍起跌爲數段少頃復合爲一其色如白金光亮可愛悞拾之觸毒卽斃其出入有度捕者置竹筒徑側彼以爲穴也而入其中急持之則完稍緩則自碎矣故名脍蛇暴乾以去瘋癘視其身上中下以治頭腹脛股罔不効也又可接斷骨價值兼金

圓蛇狀如石卵斑斕可愛悞持之得人氣卽化爲蛇嚙人卽斃尸不敢收五里内外人不敢行觸其穢氣腫

學海類編
張而斃苗人三日後取竹矢插死所七日取用中人
輒斃

蒟醬味辛乃蔓莠所造食可消瘴羊桃藤取汁可膠巨
石他處斷而膠處如故山中造石梁者常以之相續
恆數十丈駕空以渡所圯者輒非所膠處或中斷而
兩頭喬然不墜苗人以木板續之行旅往來無恙
雞縱黔中亦產但不如滇之蒙化者佳有紫白二種白
者恆殺人初秋生蔓草中始奮如笠既如蓋漸則披
紛如雞羽故曰雞以其從土中出故曰縱

蕪草卽罽麻生於澤畔多刺螫人手足輒腫脹痛不可
忍逾日方平人比之蜂蝎虻也土人採以沃湯可
療瘋瘡

凱里鉛可治蠱中毒者取以浸水作汁飲之卽愈與蘘
荷葉全効

清鎮縣故威清衛有兩尖峰平地突地起俱高千仞上
各有廟每仲春遊者絡繹

安平縣卽平霸所有喜客泉客至則湧如沸客去則否
十里沙竹有珍珠泉又名貪泉平時無水焚楮帛則

學海類編 卷之三 遊覽
泉湧如沸高噴數仞

天台山上有神女廟女冠所居翠樹葱葱頗可遊覽有泉一勺卽十萬人飲之不竭

羅漢洞深十餘里中有泉一泓其色如黝甘香清冽煮茗則色如渥丹飲之脣齒皆赤七日乃復羅德山有石羅漢遠望酷似

安順府自清鎮抵滇界十三驛俱爲所轄乃黔西孔道也出西關四十五里有龍井每年立秋日井內發聲如鼓聞數十里名龍打鼓主來歲雨多

鎮甯州本安莊衛今省入州移治於內此路山川又一變矣山亂如麻俱高萬仞山巔突起尖峰如槩如筍者指不勝屈

白水自東北高山峰半流下歷數十里而至白河懸崖數仞寬十餘仞白練飛流怒濤翻湧隔岸有碑題雪練晴川四字犀牛潭有五色雲起潭有伏犀水從峭壁直下兩水相激成霧飛灑數百步霑人衣裾相傳潭中逆變時解餉官棄金十餘萬於內人多垂涎之有善泅者沒水以求一犀熟睡波底遶皆珍寶遂擇

巨者攫之以行犀覺逐至岸泐者與之鬪力竭擲還
犀始退類齊東之語然山陰呂黍名士也作歌以記
其事摹寫極工好事者書于廟壁姑妄聽之耳潭西
有望水亭可凭眺其勝此水合盤江而趨粵西以入
海

霸陵橋卽關索橋水從西北萬山來亦合盤江而趨粵
西以入海關索嶺爲黔山峻險第一路如之字盤折
而上山半有關壯繆祠卽龍泉寺中有馬跑泉甘碧
可飲相傳壯繆少子索用鎗刺出者寺內大竹千竿

青葱可愛寺外道旁有啞泉今已閉碣曰亘古啞泉
西巔卽順忠王索祠鐵鎗一株重百餘斤以鎮山門
按陳壽三國史壯繆長子平從死甯沮之難次子興
爲侍中數年歿未有名索者意者建興初丞相亮南
征從者其索乎有功于黔土人祀之黔人呼父爲索
尊之至而以父呼之耶相傳索從亮南征爲先鋒開
山通道忠勇有父風今水旱災癘禱之輒應故血食
千古一路至滇爲關索嶺者三而滇中亦有數處似
爲壯繆子不謬也或謂關鎖嶺之訛程江夏滿江紅

末句云當年陳壽是何人史獨缺誠爲千載疑案然正史缺者頗多不獨索一人已也但不知王實甫作三國演義據何稗史而忽插入索乎是皆不得而考也下嶺卽關山驛自此以西俱高峰插天煙雲無陰晴瀾漫山谷

象鼻嶺兩峰壁立相夾一嶺如象鼻然闊三丈長百餘丈登其西畔高峰黔東諸山如培塿矣

永甯州俗呼頂站本驛也今移州治於內城北二里許有觀音洞深十里秉燭快遊亦勝事也內有石牀一

光潤如大理文石坐臥則錚錚有聲反側閒如有絲竹亂耳也好事者鐫題于石曰遊仙榻三十里外新鋪西有潭深百丈潭旁石壁高千尋如千層餅狀亦奇觀也

鐵索橋駕盤江而造江源出自烏撒苗境深山中冬日水涸始見其泉凡七十七處俱臨於一谿遶曲靖道畢節而注安南縣合粵西烏梅江而下海入滇所必由也兩峰夾峙一水中絕斷岸千尺飛流如駛蓋天設以界黔滇者也往往舟濟多覆溺患明天啓閒監

學海類編 卷之三
司朱家民始冶鐵爲絙者三十七長數十丈貫兩崖
巨石閒覆以木板相類棧道然絙長力弱人行其上
升降不已身隨搖撼不克自持車騎必下前者陟岸
後者始登若接武而行益增其險曩燬於逆今則兩
崖贅以巨石柱以強材經以鐵絙緯以平板上覆木
屋工程牢固人可駢肩馬可聯轡卽魚貫列伍而行
亦不驚矣上坡不過里許然陡峻難行下亞上關嶺
也

安南本衛近改爲縣城東里許有州牧曾公異撰墓公

四川重慶府榮昌人前朝安南衛與永甯州同城丁
亥賊薄壘公帥眾禦之兵潰被殺同城指揮某求尸
葬此墓旁有峰插天上有元帝廟南關亦有一峰相
類上有玉皇閣俱可登眺閣下卽南豐寺也語云熱
盤江冷頂站行至安南討火向八十里閒寒熱三變
天地之閒至此獨異境近粵西多瘴行旅須慎中者
急覓黃花根取汁服之卽愈自南關上坡至關將軍
飲馬泉歷五雲坡過仙人洞經老鴉關皆斜盤百曲
但石道寬平可行耳道旁石刻朱書鳥道千重四字

學海類編 卷之三 遊覽
頗壯麗度萬人橋至江西坡山嶺差平然曲折紆迴
而上深澗大壑心目茫然矣

普安縣本新興所設吏治焉出南門上坡至觀音洞過
九峰寺徧山皆羅漢松黔山俱童自此始有林木山
楂樹高數丈谷中多白雲陰晴皆然度破橋至鸚哥
嘴嘴嶺甚險有鸚鵡寺聯額皆制軍王繼文先生書
大殿制府蔡公一聯云一峰天半聞鸚語萬籟松閒
只馬蹄語佳絕自此以上俱山上生山大山之水俱
注溪澗小山之水眾道環遶無趨洩之道俱由地中

行或流入洞當春夏霖雨山巔汎濫如湖秋冬水涸
又成陸地

白雲坡甚峻兩山壁立萬仞中夾一澗橫流淙淙俯而
視之心目蒼茫普安州當黔滇之交高山萬重俱出
雲表關嶺雖峻亦無出其右也

碧雲洞在郭外數里石屏當門遊者撫摩光潤如玉幽
泉旁流聲如擊筑內有石磬扣之錚錚入洞甚黑行
百步豁然開朗卽一線天也石罅漏日洞見一切黃
匏大如斗瞿曇大士羅漢各一或倚屏獨立或傍榻

跣趺或踞崖仰視鬚眉宛然絕壁數仞有龍上昇鱗
甲欲動爪牙若舞再進則巨浪排空驚濤湧地一溪
橫流然炬以照旁有一徑甚窄側身可入盤旋數轉
丹竈藥爐在焉轉灣一浮屠矗天玲瓏巧絕再行里
許有石田千頃石閣五楹石榻石墩具焉出洞則在
峰頂俯視萬山竟同邱垤

雲安坡俗呼雲南坡高萬仞極其險峻至巔西道闊僅
數尺如一線相連止可一騎竝行稍一失足則人馬
俱墜如轉圓石於千仞之山矣仰視諸峰皆逼霄漢
諸蠻多聚族而居山半耕鑿焉

亦資孔彝語也有驛在焉其地名有革納撒麻蛾螂魯
尼多羅矣納者察皆苗中鄉談

平彝里前朝平彝所屬境也過此十里卽滇南勝景則
雲南境中矣語云萬里雲南自江甯至雲省實五千
餘里耳然道里遼闊每百里抵江南二百餘里諺曰
貴州沒天理十里當五里統而計之則萬里之說豈
虛耶

梵淨山在銅仁思南之交下小上大土名飯甑山高數

千仞有古刹六春月進香者日以千計


鏡山亦在二郡之境有石如鏡相傳八月十五夜子時萬國九州之影悉現石鏡中

黔中諸郡皆荒涼惟思南府最盛有水道通舟楫貨物俱集而人文亦可觀較之石阡思州有天壤之隔矣烏江臘月晦日夜水中見圓月影其光不減望日而娑婆樹影亦明灼如月中

天花產峭壁閒大如車輪色赤如火光映兩山皆如渥丹四月以後卽謝落

威甯府本烏撒衛地也 國初吳三桂平安氏地開四郡設府治于烏撒土產馬高猛殊他產餘無所紀也

Vertical columns of text, likely bleed-through from the reverse side of the page. The text is mostly illegible due to fading and the watermark.



溪蠻叢笑

宋 桐鄉朱 輔季公撰

木契

刻木爲符契長短大小不等穴其傍多至十數各志其事持以出驗名木契

狝黨

出入坐臥必以刀自隨小者尤銛利名狝黨

釣藤酒

酒以火成不醱不芻兩缶東西以藤吸取名釣藤酒

金鷄

羽族似雉者金項火背班尾揚翹志意揭驕籠之不能

馴

茅花被

狃猪無縣揉茅花絮布被一被數幅聯貫以成山猺皆
臥板夜然以火狃猪視猺則為富矣

辰砂

辰錦砂最良麻陽即古錦州舊隸辰郡砂自折二至折
十皆顆塊佳者為箭簇結不實者為肺眇碎則有趨起

末則有藥砂砂出萬山之崖為最狃猪以火攻取

狃猪裙

裙幅兩頭縫斷自足而入闌斑厚重下一段純以紅范
史所謂獨力衣恐是也蓋裸袒以裙代袴雖盛服不去

金繫帶

硯石出黎溪今大溪深溪竹寨溪木林岡石皆可亂真
紫石勝揭石熟猺亦能礪砥黎溪為最蓋於淘金井中
取之近亦艱得有紫綠二色圍黃者名金繫帶

粉紅水銀

水銀出於朱砂因火而就或謂砂腹生水銀非也名粉紅水銀

砂牀

石之不碎而砂附著其上者名砂牀

水秀鐵

鐵之精英在水數十年者名水秀

順水班

蠶事少桑多柘繭薄小不可縲可緝爲紬或以五色閒染布爲僞名順水班

葫蘆笙

潘安仁笙賦曲沃懸匏汶陽匏篠皆笙之材蠻所吹葫蘆笙亦匏瓠餘意但列管六與說文十三簧不同耳名葫蘆笙

燕子花

紫花全類燕子生於藤一枝數葩

不闌帶

蠻女以織帶束髮狀如經帶不闌者斑也蓋反切語俚俗謂團爲突欒孔爲窟籠亦此意也

野鷄斑

枋板皆杉也木身為枋枝梢為板又分等則曰出等甲頭曰長行曰刀斧皆枋也曰水路曰笏削曰中杠皆板也腦子香以文如雉者為最佳名野鷄斑

娘子布

漢傳載闌干闌干獠言紵今有績織細白苧麻以旬月而成名娘子布

點蠟幔

溪洞愛銅鼓甚於金玉模取鼓文以蠟刻板印布入靛

缸漬染名點蠟幔

絲金

沙中揀金又出於石碎石而取者色視沙金為勝金有苗路夫匠識之名絲金

馬王菜

葉似蔓菁味苦多刺即諸葛菜也

三脊茅

麻楊苞茅山茅山三脊孟康曰零茅楊雄曰璫茅皆三

脊也齊桓責楚苞茅不入者即此

鴉銜草

紫草爾雅謂之藐廣雅謂之苳莫本草云生楚地三月採根陰乾瑤人以社前者爲佳名鴉銜草

雞骨香

降真本出南海今溪洞山僻處亦有似是而非勁瘦不甚香名雞骨香

出山銀

西溪接靖州境出鉛鉛中有銀銀體差黑未經坯銷名出山銀

雞末子

古有細蟲曰焦螟集於蛟睫蠻地有蟲極細拭目難覩黑點著身抓搔不可耐名雞末子

九肋鼈

沙鼈似馬蹄者佳九肋出阮江

銅鼓

蠻地多銅鼓有銅柱馬希範所立麻陽有銅鼓蓋江水中掘得如大鐘長筭三十六乳重百餘斤今入天慶觀并有銅像二相傳唐明皇像餘散他處鼓尤多其文環

學海類編 卷之五 五 遊覽
以甲士中空無底名銅鼓

不乃羹

牛羊腸臟略擺洗羹以饗客臭不可近食之既則大喜
嶺表錄異曰交趾重不乃羹先鼻引其汁不乃者反切
擺也

圈布

桑味苦葉小分三叉蠶所不食狢狢取皮績布繫之於
腰以代機紅緯回環通不過丈餘名圈布

豎眼狢狢

狢狢蠻之尤怪者兩目直生惡青衣人遇之則有禍去
麻陽百餘里不常見

獨木船

蠻地多楠有極大者剝以爲舟

芷

香草見離騷有一穗數花與蕙芷不同開亦先後皆蘭
類也

黃貓頭

蠻類不巾髮拳曲照日金色故名

學海類編 卷之六
光面蠟

蠟出山不經僞者名光面

飛純

土俗歲節數日野外男女分兩朋各以五色綵囊豆粟往來拋接名飛純

客鼓

鼓之節不一有暗箭鼓集人鼓犒設鼓饗客亦以此遠近聽以爲準酒酣少有參商則鼓聲隨變終席無他者名客鼓

固項

朱漆牛皮以護頭頸名固項

銀鶉鳩

狔狍之富者多以白金象鳥獸形爲酒器或爲牛角鶉鳩之狀每聚飲盛列以誇客

筒環

狔狍妻女年十五六敲去右邊上一齒以竹圍五寸長三寸裹錫穿之兩耳名筒環

門款

彼此插血誓約緩急相援名門款

大設

富洞以九月燕及三年一犒爲大設

入地

狃猪自別洞奔來此地居止名入地

鷓鷯號

戰鬪出入羣聚發喊以張聲勢也

羊棲

狃猪以鬼禁所居不著地雖會長之富屋宇之多亦皆

去地數尺以巨木排比如省民羊柵杉葉覆屋名羊棲

左右押衙

狃猪比猺苗則妄自尊大歲時旦望或客至皆排衙主盟其事者爲隊又其次名左右押衙

坐草

山猺潛出省地茅葦中射弩奪物機不虛發名坐草

客語

能省民之言者名客語

準把

互市逾約價償未足則刼去省民甲以乙代名準把

踏歌

習俗死亡羣聚歌舞輒聯手踏地爲節喪家椎牛多釀以待名踏歌

讎殺

夷性好殺一語不合便刺以刃百十年必報乃已名讎殺

專事

溪洞文移他人不能特選往來之熟者名專事

骨債

或爲傭而亡或以煙而死約牛牲若干償還名骨債

走鬼

初夏徙居數日以舍祖居否則有禍名走鬼

鼻飲

狃猪飲不以口而以鼻名曰鼻飲

喫鄉

秋冬之交聚飲以樂名喫鄉

癆魚

山獠無魚具上下斷其水揉蓼葉困魚魚以輶出名瘠魚

賣首

狃狃之受犒者如熟戶之獠既納款聽命縱其出入省地州縣差人管轄或自推首名賣首

打寮

山獠穴居野處雖有屋以庇風雨不過剪茅叉木而已名打寮

生界

去州縣堡寨遠不屬王化者名生界

呈生

祭祀必先以生物呈獻神許則殺以血和酒名呈生

挖親

山獠婚娶聘物以銅與鹽至端午約於山上相攜而歸名挖親

骨浪

獠獠睡不以牀冬不覆被用三叉木支闊板旁然火炙背焦則易蓋以板之易得也以展轉之意名骨浪

隊小

狔狔之隨從者如軍中行伍名隊小

舞杵

醉後以長柄木杵跳舞亦有音節也

平坦

巢穴外雖峙嶮中極寬廣且以一處言之狔狔有鳥落
平言鳥飛不能盡也周數十里皆腴田凡平地曰平坦

例牛

牛客多行桃源路洞中占軍事勝負及疾病祈禳皆以

牛用名例牛

跳雞模

藝精者擲刀空中接之名雞模

洗面

借人助相讎殺以牛酒往謝名洗面

奴狗

狔狔之為傭者名奴狗

背籠

負物不以肩用木為半枷之狀箝其項以布帶或皮繫

學海類編

溪蠻叢笑

七

遊覽

之額上名背籠

葬堂

死者諸子照水內一人背屍以箭射地箭落處定穴穴中藉以木貧則已富者不問歲月釀酒屠牛呼團洞發骨而出易以小函或柳崖屋或掛大木風霜剝落皆置不問名葬堂

爬船

蠻鄉最重重午不論生熟界出觀競渡三日而歸既望復出謂之大十五船分五色阜船之神尤惡去來必有

風雨一月前眾船下水飲食男女不敢共處弔屈原正楚俗也名爬船

隘口

凡眾山環鎖盤紆拂鬱絕頂貫大木數十百穴一門來去此古人因谷爲寨因山爲嶂之意名隘口

十莊院

數十年前獠獠侵占蝦蟆行寨省地土人申請招致靖州猓猪防托借田買屋以居名十莊院

漚榔

牛榔木多漿苗猺歲饑闕食則先以火窖地握根置窖
中壓以石又用火漚熟漚漬搗作餅餌名漚榔

椎結

胎髮不薙除長大而無櫛篦不裹巾蓬垢鬚鬢自古以
然不可化也名椎結

富貴坊

競渡預以四月八日下船俗聚飲江岸舟子各招他客
盛列飲饌以相誇大或獨酌食前方丈羣蠻環觀如雲
一年盛事名富貴坊

對刀

甲與乙有隙兩相對敵背牌護身遠以標槍槍盡挺刃
而前名對刀

出面

挖親之後年生子引妻攜酒歸見婦家名出面

許陳之遊學不日而歸其學益進其志益壯

三

許陳之遊學不日而歸其學益進其志益壯

許陳之遊學不日而歸其學益進其志益壯

溪蠻叢笑終

